

Pauro Homa ezeiksa bo ziwatahaka

Pauro Homa ezeiksa bo ziwatahaka asahi Sudeutsabyitsa iwatahi ispe niy:
— Taparaka Deus Abarão ziwatawy itsekokatsa humo kino niwatihi nisiwatawy, iwatsahi ityryktsa niyziknaha. Sudeutsa Abarão tsekokatsa. Tubabatu Deus taharere ty Moises bo nyny niy iwahahi ziwatahaka, iwaze Sudeutsa ana humo hi yh̄y ziknakaranaha. Taparaka Sudeutsa zuba Deus tyryktsa. Aiba eze zuba Deus meky watu niy, Sesus Kiristu iharapatawyhyta humo nihyrikosokda, mysapyzeken nihyrikosoda iwatahi Deus mysopyksapybyri humo mymyokzo. Abaka kytsa ihumo sispirikporêtsaktsa ityryktsa myziknaha. Taparaka Sudeutsa abaka Sudeutsabyitsa kino niwatihi ityryktsa myziknaha — niy. Homa ezeiksa ana humo hi batu sihyrinymyry iwaze Deus Pauro ziapewywyky iwatahi ziwatahaka. Abaka katsa kino niwatihi Pauro wataha humo tanymyryky.

Deus wasania ty myzubaha bo my.

1 ¹O Homa ezeiksa ahabo piwatahaka. Utakta Pauro. Sesus Kiristu tsumuēh̄itsa Deus zikwatawy niy. Ata hi:

— O Pauro ikia apehata tsimy. Wasaniha ty nanabyitaba tynatsasokokta! — niy.

Hȳy iky.

²Tubabatu Deus sohotsa tihi:

— Deus wasania ty mybarawy ezeiksa myzubaha bo mysipeha. Asaktsa Deus harere kytsa sizubarêtsa bo mykaranaha — nikaranaha. Ana kino botu ziwataha iharere papeu humo ziwataha. Iharere wasani my. Ana ty hi botu ziwataha abaka atsatu wasani mykara, Deus wasania ty motsasokonaha.

³Deus wasania ty tatse soho. Sesus Kiristu mypehakatsa. Atahi mybarawy bo inasik Dawi tsekokatsa niyzik. Deus tse mywata niyzik. ⁴Deus hyrikoso ituk mynapykyryk. Atahi mybarawy bo inasikze atakta wasani haty ziknakara. Tsimysapyrêta ziknakara. Nihyrikosokda. Bykyze Deus zikwy humo inahyrikizkpo. Ispitu niyzikzo. Ana humo hi kytsa sizubarêtsa:

— O atakta Deus tse babata. Iktsazubatahaktsa — niaha. ⁵Ihumo Deus piksapywyky. Deus hi zikwatawy wasania ty iakzohota kytsa sizubarêtsa

bo motsasoko ana humo hi zikpeha. Iwatsahi kytsa sizubarêtsa Sesus Kiristu harere piwabykynahaze hỹ mykaranaha. Ihumo sispirikporêtsa moziknaha h̃y. ⁶Ikiahatsa Homa ezektsa kino niwatihi Deus tyryktsa tsimoziknaha. Ana kino Deus mozihikik.

⁷Iwaze ababo piwatahaka, ikiahatsa Homa ezektsa. Deus ahahumo tsimypokzitsiarêta h̃y, ityryktsa tsimoziknaha anahi nizihikik. Deus myzo. Sesus Kiristu mypehakatsa. Utakta ahatsyhyryze ispe my:

— O Deus myzo Homa ezektsa tysisapywykykta! Sesus Kiristu humo sakurêtsa babatsa moziknaha h̃y — my. Iwa myh̃y.

**Pauro Sesus Kiristu humo ka tsakurêta iwaze Deus
bo Homa ezektsa tsyhyryze mopamykysoko.**

⁸Iwaze myzubarêtsa ahasoho humo tihi:

— O Homa ezektsa Sesus harere bo hỹ — mykaranaha. Ana humo hi piwabykyze kakurêta h̃y. Deus pe my:

— O Deus myzo ikia zuba tsamysapyrêta ikia Homa ezektsa botu tsiksitsumuêh̃i iwatsahi ahumo sispirikporêtsa moziknaha — my. Iwa Deus pe my. ⁹Pibyituhukutu ahasoho bo mytsaty mykara. Ahatsyhyryze Deus bo mopamykysoikik. Deus zikwatawy iwatahi itsyhyryze tarabaja mykara. Nanabyitaba Deus wasania ty tatse soho motsasoko ana hi kahyriziktsozkawy. Uta ahahumo kamypokzitsiarêta iwatahi Deus bo mopamykysokoze hi:

¹⁰— O myzo Homa ezektsa bo mynakozore zeka kakurêta mykara. Tsiplikpeha zeka sibo mynakozore! — my. ¹¹Ikiahatsa humo kahyrizikbarêta. Ahabo mynakozore tsihikik. Hawa Deus zikyrynymyryky atsa tu pahahyrinymyry tsihikik iwaze Sesus harere bo hỹ tsimykaranaha h̃y. ¹²Iwa uta hi pahakuwyky. Ikiahatsa kino niwatihi tsiipikykuwykynaha. Katsaktsa Sesus harere bo hỹ tsimykaranahaze tsimyharapekuwykynahaktsa.

¹³O katukytsa ababo mynakozore tsihikikze batu zik, tsihokdaharêna iwatahi batu pão. Kytsa Sesus harere bo hỹ mykaranaha ana humo hi mozihikik. Ahatukytsa Sesus humo sispirikporêtsa ana hi mozihikik iwatahi ababo mynakozore tsihikik h̃y. Utsa kytsa Sudeutsabyitsa Sesus humo sispirikporêtsa ikiahatsa tuk Sesus harere bo hỹ mykaranaha asa watsa hi mozihikik. ¹⁴Deus myzubaha bo zikpeha. Iwaze bipyritsa bo mykara. Bipyritsabyitsa bo kino niwatihi. Utsa papeu humo sihyrinymyrêtsa bo mykara. Asaktsa papeu humo sinyhy byitsa bo mykara. Myzubaha bo mykara, sibo Deus wasania ty motsasokoro Deus zikykzo tahi mykara. ¹⁵Iwatahi Homa bo pomo tsihikikze tu, ababo Deus harere motsaso tsihikik h̃y.

Deus wasaniha humo mekywa tu tsimoziknaha.

¹⁶Aty zeka Deus harere bo hỹ mykara atakta Deus zikwy humo ityryk mozik Deus tuk mozuruku. Tapara Sudeutsa Sesus harere bo hỹ nikaranahaze

ityryktsa niyziknaha. Kyze Sudeutsabyitsa Sesus humo sispirikporëtsaze ityryktsa niyziknaha. Ana humo hi kakurëta. Iharere humo batu kasikpyby. ¹⁷Deus wasania ty tsiپیwabyinahaze isoho humo myhyrinymyrëtsa. Hawa kytsa simysapyrëtsa moziknaha ihumo tsipinymyrykynaha. Deus hi:

— Asa zuba Sesus harere bo hyÿ mykaranaha asahi kaokzeka wasani mykaranaha. Pibyituhukutu Sesus harere bo ma mykaranaha — my. Deus harere papeu hi:

— Aty zeka Deus humo tsimysapyrëta mozik iwatahi pibyituhukutu Sesus harere bo hyÿ mykara — niy.

Kytsa sisopyksapybyitsa tu nikaranaha ana humo hi Deus taokaniki.

¹⁸Deus ta bijoikpe eze tu my. Kytsa sisopyksapybyitsa tu nikaranaha humo Deus taokaniki. Atahi:

— Kaokzeka ikiahatsa batu ahasopyksapy — my. Kytsa Deus harere humo batu hÿ zikaha, ustsā kytsa mysisapybyikinaha. Kytsa Deus wasania ty motsasokonahaze ustsā kytsa mysiaknikinaha, kytsa Sesus bo hyÿ mykaranaha ihumo sispirikporëtsa moziknaha ana humo kino batu hÿ mykaranaha. Iwatsahi Deus okzeka batu sisopyksapy maha. ¹⁹Hawa Deus mykara anatyhi mybarawy Ezektsa bo botu nisihyrinymyry. Iwaze hawa Deus mykara kytsa mysihyrinymyrykynaha tsahi batu hÿ zikaha. Iwatsahi ihumo batu siakparawy. Iwatahi Deus mysininiwyky.

²⁰Katsa Deus ba zynynaha. Deus koikny bakta tu mybarawy nizukni. Nizukni naha bo iktsa tsimahaze. Katsa hi:

— O mybarawy sukniṣta zikwykyta my. Atahi Deus babata — tsimykarānaha. Ustsā kytsa hawa Deus soho mytsaty mykaranaha batu taharere ty harapubeteheke nikaranaha. Ba zikṣtasō:

— Hawa Deus mykara myhumo tsihokdaharëna — maha. Iwaha hi ba zikṣtasō. ²¹Hawa Deus mykara sihyrinymyrëtsa. Iwatsatu batu ipe niaha:

— O ikia zuba wasani tsimykara. Ikiā zuba tsamysapyrëta — maha. Iwaha hi ba zikṣtasō. Paikpa mytsaty nikaranaha. Simytsatyhybyitsa tu kytsa watsa asahi miwaha buruk nizaranaha. ²²Tahapetu sisopyk:

— O katsaktsa myhyrinymyrëtsa — mytsaty ahabyitsa tu nikaranaha. Deus okzeka batu aty tohi sinymyryhy. ²³Deus zuba koikny baktatu my. Asaktsa Deus bo ba zynynaha iwatsahi iharere bo batu yhÿ nikaranaha. Ihumo batu simyharerewaby batu iktsazuba zikaha. Iwaze asahi:

— Katsaktsa kytsa hyrikoso watsa tahasuknikinaha! Siraratsa hyrikoso tsawatsa nisisuknikinaha. Sisarakatsa hyrikoso tsawatsa nisisuknikinaha! Piryhyktsa hyrikoso tsawatsa nisisuknikinaha. Deus myhyrikoso hyrity wa ta bo zuba — mytsaty nikaranaha. Asa kino siharerewabymybarëtsa iktsazuba sisopyk.

²⁴Asaktsa sakmyirëtsa watsa nikaranaha iwaze simysapybyitsa zuba mozihikiknaha atsatu mynakanaha. Iwatahi Deus nisierekek

hawa mozihihiknaha astsa tu mykaranaha. Tyhapemyijaikiknaha, tyharapesapybyikiknaha. ²⁵Asaktsa Deus harere bo batu yhỹ zikaha. Wasaniha humo ka batu hỹ zikaha. Hawa ha ty batu mysapy ana humo ka hỹ mykaranaha batu sispirikpo. Myspihikbatawy bo zuba yhỹ mykaranaha. Deus nizukni naha humo siakparawy nikaranaha. Deus babata batu siakparawy nikaranaha. Batu sispirikpo, ata bo hi katsa siakparawy tsimaha iharere bo ma tsimahaktsa! Iwa tsimaha. Ata hi tawahi mynapykyk iwatsahi katsa hi:

— O ikia zuba tsapunihikrēta. Ikie tsamysapyrēta — tsimaha. Iwa tsimaha hỹ.

²⁶Iwatsahi asaktsa Deus humo simyharerewabybyitsa tu Deus nisierekek. Zimi tsihikiknaha atsatu mykaranaha. Iwa Deus kytsa nisierekek. Wytykyryk tahabariktsa tuk batu hỹ zikaha asiza zuba tahawaky wytykyryk humo zuba ziknakaranaha. ²⁷Kytsa kino niwatihi wytykyryk waza tahaokeza ba ziksipyryryknaha. Tahawakytsa humo zuba mozihihiknaha ana humo hi batu sisopyksapy my. Ziknaharape wowokonaha sisapybyitsa tu nikaranaha ana humo hi siakmyitsa niyziknaha. Deus hi nisisininiwyky, iharere bo zimiyiwykynaha.

²⁸Hawa ha ty Deus soho wasaniha bo hỹbyri nikaranaha, iwatsahi simysapybyitsa soho bo zuba mytsaty ziknakaranaha. Iwaze Deus nisierekek iwaze hawa nizihikiknaha atsatu mynakaranaha. ²⁹Iwatsahi wasaniyitsa mozurukunaha. Pibytuhukutu sisopyksapybyitsa mykaranaha. Utsa kytsa namy zuba mozihihiknaha. Taha bo zuba mytsaty sisopyk. Okyrysaro tsihitsa moziknaha. Myzokdiwy mynakaranaha. Mysukyrywy. Simyspihikbatakatsa. Sisakimiyijanikitsa. ³⁰Siharerewabymybarētsa. Deus humo tahakyrikinaha. Siharereziubyikitsa. Asahi:

— Katsa zuba myhyrinymyrētsa nikaranaha. Katsaktsa mymysapyrētsa — mytsaty ahabyitsa nikaranaha. Pibytuhukunaha tu tahapetu sisopyk:

— Hawa ha sa batu imysapy tsimaha — iwa mytsaty mynakaranaha. Tahazotsa harere bo batu yhỹ zikaha. ³¹Wasaniha baba humo batu sihyrinymyry tsihikbyitsa. Motsasokonahaze batu wasani zikaha. Utsa kytsa ty batu isty tsumuēhī nymyryhỹ. Batu aty tohi humo ba zipokzitsi. ³²Deus hi:

— Asaktsa simysapybyitsa tu mynakaranaha sinini ykarawy bo mysipeha. Anaeze tahawahi mynapykyryknaha — my. Ana harere humo sihyrinymyrētsa. Iwatsa tu batu ma zikaha. Utsa kytsa mysimiwykynahaze sihumo tahaydikiknaha. Iwa my.

Deus myzubarētsa huak ty sibo nyny my.

2 ¹Kaharereziuwyttsa ikiahatsa ja. Sozeka ja ahatuk tsimypamykysonaha.

— Asaktsa Deus okzeka batu sisopyksapy mykaranaha. Katsaktsa batu siwatsa — tsimykaranaha. Ikiahatsa siwatsa hi tsimykaranaha iwaze ahaharere ty harapubeteheke tsimykaranaha. ²Deus zuba wasani haty mynakara. Deus tihi:

— Aty imysapybara ty mykara zeka atakta sinini ykarawy bo pipehahik — my. Anaharere wasani my. ³O kaharereziuwytza. Ahape tu ahasapyk zeka:

— Deus ustsá simysapybyikitsa tu nikaranaha humo mysininiwyky. Katsaktsa batu — mytsaty ahabyitsa tsikykaranaha. Ikiahatsa kino atsatu tsimykaranaha. Ikiahatsa Deus harere humo ka ba zikwaknaha iwaze sinini tsimykaranaha! ⁴Ikiahatsa Deus humo tsimysapybyrikinaha. Deus ahahumo tsiakubyrisorokrêta. Ahahumo tsimypokzitsiukrêta. Pahasapywyky. Ahamysapybara ty tsmoewynaha iwa mozhikik. Ahamysapybara ty tymoewy ahabyizeka pahasininiwyky. Ikiahatsa hi:

— O mysapybyitsa tu tsimykaranaha Deus mybo ba zikmysininiwy — mybarapetu tsimykaranaha. ⁵Iwatahi sihumo Deus taokaniki. Asaktsa simysapybyitsa tu mynakaranaha mysininiwyky. Hanawa puruze Deus simysapybyikitsa sinini ykarawy bo mysipehahik. Wasani my simysapybyitsa tu nikaranaha. Ikiahatsa ahamysapybyitsa tu tsikykaranaha batu tymoewy. Tahatsiktu nikaranaha iwatsahi pahasininiwyky hÿ.

⁶Bykzyze Deus kytsa atsehezubaha bo ihuak ty sibo nyny my. Hawa mozurukunahaze ihuak ty sibo nyny my. ⁷Wastuhu mybarawy ezektsa ustsá kytsa nisisapywykynaha. Iwa Deus sisoho wasani haty motsasoko anahi mozhikiknaha. Tahawahi Deus tuk mynapykyryk tsihikiknaha ana hi taperyky. Deus harere bo zuba hÿÿ mozhikiknaha iwaze Deus tyryktsa moziknaha. Myhyrikosokdanahaze Deus tuk tahawahi mynapykyryknaha hÿ. ⁸Ustsaktsa batu. Deus harere bo batu yhÿ ziknakaranaha. Sisopyksapybyitsa tu nikaranaha Deus taokaniki iwatahi ihuak ty sibo nyny my ana hi wasani my.

⁹Deus mysininiwyky mysimyitsapyriwyky. Sudeutsa, Sudeutsabyitsa bo kino niwatihi kytsa sizubarêtsa asaktsa pimyikinaha simysapybyitsa tu nikaranaha humo ihuak ty sibo nyny my, ana hi wasani my. ¹⁰Asaktsa ustsá kytsa bo mysisapywykynaha ihuak ty sibo nyny my. Sudeutsa Sudeutsabyitsa bo kino niwatihi myzubaha bo my. Simysapyrêtsa tu Deus mysisoziuku. Simyharerewabynikitsa moziknaha. Ba paikpa mytsaty zikaha ihumo sakurêtsa moziknaha Sudeutsa, Sudeutsabyitsa bo kino niwatihi mykara. ¹¹Deus okzeka atsezubaha nimysukni, myzubaha humo tsimypokzitsiukrêta iwaze Sudeutsa, Sudeutsabyitsa humo kino niwatihi ihuak ty Deus sibo nyny myze wasani.

¹²Sudeutsabyitsa Moises sopykwy ty humo batu sihyrinymyry. Iwatsahi Deus harere Moises ziwatahakanaha batu tyny. Iwatsa tu mysapybyitsa tu nikaranahaze Deus sinini ykarawy bo mysipehahik. Batu ispe my:

— Moises sopykwy humo ka batu yh̃ tsimykaranaha — my. Iwa batu tyso. Moises sopykwy humo ka batu tyny. Sudeutsa zuba Moises sopykwy humo sihyrinomyrëtsa. Iwatsa tuze simysapybyitsa tu nikaranaha Deus sinini ykarawy bo mysipehahik. Ispe my:

— Ikiahatsa kaharere bo batu yh̃ tsikaha. Kaharere Moises ziwatahanaha batu yh̃ zikaha — my.

¹³Asaktsa Moises sopykwy humo hỹ mykaranahaze wasanihatsa mykaranaha. Deus ispe my:

— O ikiahatsaktsa ahamysapyrëtsa — my. Asaktsa Moises sopykwy humo waby zuba sisopyk, iwaze ana harere bo batu h̃ mykaranaha Deus okzeka batu simysapy iwatahi ba ziksibetesaka.

¹⁴Sudeutsabyitsa batu Moises sopykwy sinyhy. Iwatsatu wastuhu kytsa sinyhybyitsa tu ana papeu humo hi hỹ mykaranaha kytsa watsa asahi papeu humo sihyrinomyrëtsa. Nawa ha ty wasanikia ty Sudeutsabyitsa sihyrinomyrëtsa. ¹⁵Hawa mozurukunaha, ustsas kytsa sibo iktsa mykaranahaze asahi:

— Asaktsa batu Moises sopykwy. Sinyhybyitsa tu iwatsa tu wasani sihyrinomyrëtsa. Hawa imysapybara ty sihyrinomyrëtsa — maha. Iwa h̃. Tahapetu sisopyk:

— Ana hi wasani. Ana hi batu mysapy — maha. Sispirikporëtsa maha. Iwa ustsas kytsa sisoho mytsaty mynakaranaha.

¹⁶Bykzehu ana humo kino nawa my. Hawa kytsa mozurukunaha Sesus Kiristu sihuak ty sibo nyny my. Deus wasania ty motsasokoro anahumo kino hỹ mykara. Hawa mytsaty tsimykaranaha ustsas kytsa batu sihyrinomyry, Deus zuba mysoho humo tsihyrinomyrëta iwatahi ihuak ty mybo nyny my.

Sudeutsa Deus harere ibyky Moises ziwataha ana bo batu h̃ nikaranaha.

¹⁷Ikiahatsa ja:

— O katsaktsa Sudeutsa tsimaha. Deus harere ibyky Moises ziwataha ana bo hỹ tsimykaranaha ana humo hi mysapyrëtsa. Deus taparaktsa humo nisiwatawy iwatsahi ityryktsa tsimoziknaha — tsimykaranaha. Iwa tsinapamykysokonaha. ¹⁸Katsa hi:

— Hawa Deus mozihihik myhyrinomyrëtsa. Moises harere humo wasani haty tsinomyrykynaha imysapybara tyka kino niwatihi tsinomyrykynaha Moises sopykwy humo ka myhyrinomyrëtsa, tsinomyrykynaha — tsimaha.

¹⁹Ustsas kytsa Moises sopykwy humo batu sihyrinomyry. Iwaze ikiahatsa hi:

— Katsa zuba iharere humo myhyrinomyrëtsa. Katsaktsa ustsas kytsa tahahyrynyry tsihikik. Asahi sihyrizikubyitsa watsa,

iwatsahi mysitsumuêhîna. Katsakta rika watsa myhyrinymyrêtsa tu uatsa kytsa bo wasania ty sibo tsimytsasokonaha. Katsa kytsa mysihyrinymrynahaze sispirikporêtsa moziknaha iwatsahi rika watsa tsimaha. ²⁰Sihyrinymrybyitsakta tahahyrinymrykynaha. Asahi tsikaeni zuba sihyrinymyrêtsa. Katsakta Moises sopykwy humo tsinymrybanaha iwatsahi sispirikpobyitsa bo tahahyrinymrykynaha — tsimykarana. ²¹Uatsa kytsa bo ahaspirikpowy tsimysihyrinymryikiknaha. Ahape tu batu ahasopyk. Ahaspirikpowy humo batu hÿ tsimykarana. Ikiahatsa hi:

— Uatsa namy humo ba zikmytsyhyryboanaha — tsikykaraha. Ikiahatsa ja. Uatsa namy humo tsikahatsyhyryboakanaha.

²²— Uatsa okeza ba ziksihuahuanaha — tsikykarana. Ikiahatsa ja. Uatsa okeza tsimysihuakuanaha.

— Deustsabyitsa bo ka ahanamy ty batu nyny zikaha! — tsikykarana. Ikiahatsa ja. Deustsabyitsa wahoro bo tsimypupunaha iwatsahi sinamy ty tsikahatsyhyryboakanaha. Iwa tsimykarana ahamysapybyitsa siwatsa tsimykarana. Asakta batu imysapy maha ikiahatsa kino niwatihi batu ahamysapy tsimaha ²³Kytsa sizubarêtsa pe tsimaha:

— Katsakta Moises spirikpowy humo tsinymrybanaha — tsimaha. Ana harere ty batu hÿ tsimykarana, iwatsahi Sudeustsabyitsa ahamo Deus harere bo batu ma zikaha. ²⁴Iwaze Deus harere papeu humo botu ziwataha:

— Sudeustsabyitsa Sudeusta humo, Deus soho pisapybyikinaha Sudeusta nisimynahatsa iwatsahi Sudeustsabyitsa Deus soho pisapybyikinaha — niy.

²⁵Katsakta Sudeusta mypiak humo tsizyzykynaha. Wasani tsimaha. Tubabatu Moises tihi:

— Ahapiak tyzyzykynaha anahi awatawy Deus hyrytsa tsimaha — niy. Iwaze mypiak tsizyzykynaha Moises mype niwatihi hawa tsimyzurukunaha, ana ty hi mymyhyrinymryky.

— Ikiahatsa Moises spirikpowy tsizubarêna bo yhÿ ahabyi zeka iwaze ahahyrytsa ty zyzykbyitaha mahani iwatawywy. Ikiahatsa Sudeustsabyitsa watsa, asahi Moises spirikpowy batu ahawabyhy asahi Deus harere humo batu sihyrinymry. ²⁶Sudeustsabyitsakta batu sipiak zyzykyhyk. Iwatsatu pisapywykynaha iwa Moises spirikpowy humo mykarana zeka Sudeusta watsa moziknaha. Deus okzeka ihyrytsa moziknaha, iharere bo hyÿ mykarana humo. Sipiakzyzykybyitsa kino Deus okzeka ihyrytsa moziknaha.

²⁷“Katsakta Sudeusta tsimaha mypiak tsizyzykynaha Moises spirikpowy humo myhyrinymyrêtsa. Iwatsahi nawa tsimyzurukunaha zetu tsinymrykynaha.” Iwa batu tsimykarana Deus harere bo batu hÿ

tsimykaranaha. Sudeutsabyitsa sipiakzyzykykbyitsa. Moises spirikpowy humo batu sihyrinomyry. Wastuhu wasani mozurukunaha ana harere bo hỹ mykaranaha iwaze Deus okzeka simysapyr̃etsa moziknaha. Sihyrinomyrybyitsa tuze iharere humo wasani mykaranaha. Ikiatsa Sudeutsa tsimaha iharere bo batu h̃y tsimykaranaha iwatsahi Deus okzeka batu ahasapy tsimaha.

²⁸Katsaktsa tsipisapykynaha Deus harere bo hỹ tsimykaranaha zeka ihyrytsa tsimoziknaha. Katsaktsa mypetu mysopyk zeka:

— O katsaktsa Deus tyryktsa iwatsahi myhyrytsa piak tsizyzyknaha. Moises spirikpowy humo myhyrinomyr̃etsa iwa Deus hyrytsa tsimaha — mybarapetu mysopyk. Ikiatsa iharere bo hỹ zikahabyitsa tu iwatahi Deus batu tyso:

— Ikiatsa kahyrytsa tsimaha — iwa batu tyso. ²⁹Uta ahape:

— Aty sa Sudeu babata my. Aty sa Deus hyrytsa maha. Atahi Deus harere bo hỹ mykara, atakta Deus harere mozihikik — my. Deus hyrikoso ituk mynapykyryk. Wastuhu sipiakzyzykykbyitsa Deus harere bo hỹ mykaranaha. Iwaze Deus ispe my:

— O ikiahatsa ahamysapyr̃etsa — my. Kytsa sisoho humo batu siharereziu Deus zuba sisoho mysiharereziuku. Kytsa sizubar̃etsa Sudeutsa, Sudeutsabyitsa kino niwatihi Deus harere bo hỹ mykaranaha zeka, asaktsa Deus hyrytsa babatsa moziknaha h̃y.

3 ¹Kytsa sizubar̃etsa Deus harere bo hỹ mykaranahaze Deus hyrytsa moziknaha. Iwathatu wastuhu ahatukze tihi:

— Amy skaraba Sudeutsa tsimaha. Amy skaraba myhyrytsa piak tsiksizyzyknaha. Tymytsumũeh̃inaha ja — tsimaha. Iwa batu tyso. ²Uta tihi:

— Pahatsumũeh̃inaha h̃y. — Mydiritsa zizyzyknaha humo Deus hyrytsa ziwatahaw y iwaze Deus Moises bo nitsasoko, atahi taparaktsa mydiritsa bo nitsasoko. Ata humo hi Moises spirikpowy ziwataha. Iharere Sudeutsa taparaktsa bo zuba nitsasoko aiba zuba usts kysa iharere piwabynaha. ³Sozeka ja ikiahatsa kape:

— Mydiritsa Moises harere bo yh̃y nikaranaha. Wastuhutsa taparaktsa mydiritsa Deus harere bo batu h̃y nikaranaha. Iwa zeka Deus harere sibo batu h̃y my — tsimaha. Batu ba Deus wasani mynakara. ⁴Hawa ha ty Deus motsasoko atsatu isopyk. Deus ba zikmyspihikbata. Kytsa sizubar̃etsa mospihikbatakanaha zeka Deus batu. Deus harere papeu humo botu ziwataha:

— Tsimytsasokoze kytsa sizubar̃etsa tihi “O Deus aharere wasani my” maha.

Asahi tihi zeka iharere batu isapy maha asahi zimyikinaha siharere batu wasani my
Deus zuba wasani

Deus papeu niy.

⁵Tozeka ja wastuhutsa kytsa motsasokonaha:

— Katsakta wasanihabyitsa tu tsimykaranaha zeka kyze kytsa mybo iktsa maha zeka “O Deus zuba pisapyky” mykaranaha, iwatsahi mysapybyitsa tu tsimykaranaha Deus soho kytsa mysihyrinymyrykynaha — maha. Asahi:

— Mysapybyitsa tu tsimykaranaha zeka Deus zuba tsimysapyrêta kytsa mysihyrinymyry. Iwatahi Deus ihuak ty mysapybara ty humo batu nyny ziky batu wasani ziky — maha. Mybarawy ezektsa watsa mytsaty mykaranaha asahi iwa mopamykysonaha. ⁶Niwazuba! Deus siwa batu mytsaty ziky myhumo wasani isopyk. Atahi tisopyksapyrêta mybarawy ezektsa mywatu ihuak ty mybo nyny my. Hawa mozurukunaha humo ihuak ty nyny my. Wasani byitatu zeka ana kino batu ziky, atahi imysapyrênikita tu iwatahi mybarawy ezektsa bo ihuak ty nyny my.

⁷Tozeka ja kape tsimaha:

— O utakta wasani ahabyizeka asakta kabo iktsa mahaze tihi: “O Deus zuba wasani mykara” maha. Kamysapy byizeka kytsa tihi: “O Deus ikia zuba amysapyrênikita” maha. Iwatahi kytsa Deus soho kahumo sihyrinymyrêtsa. Deus sinini ykarawy bo pikpeha zeka batu isopyksapy kaokzeka batu wasani — my. Iwa batu tyso. ⁸Ana humo kino wasape tsimaha zeka ikiahatsa tihi:

— O mysapybyitsa tu tsimykaranahaktsa kytsa! Iwa kytsa sizubarêtsa Deus harere bo hyÿ mykaranaha, atahi imysapyrênikita maha — tsimaha. Batu ba. Ana harere hi asakta kytsa kahumo batu siakparawy motsasokonaha. Iwa piksohometukunaha — ana soho hi Pauro motsasokoro — mybarapetu mykaranaha. Asakta Deus mysisininiwyky. Atahi ispe my:

— Ikiahatsa batu ahamysapy — my.

Batu aty tohi Deus okzeka tisopyksapyrêta.

⁹Kyze wastuhutsa tihi:

— O katsakta Sudeutsa wasani tsimaha Deus harere mybo nitsaso. Sudeutsabyitsa batu, Deus sibo ba ziktsaso. Iwa Deus okzeka batu sapy maha — mykaranaha. Katsakta Sudeutsabyitsa watsa myzubarêtsa. Tsimysapybyi tsihikiknaha mysapybyitsatu tsimykaranaha batu tymoewy. Iwa botu icy. ¹⁰Deus harere botu papeu humo ziwatahaka:

— Mybarawy ezektsa batu wasani zikaha. Batu aty tohi isopyksapy. Kytsa sizubarêtsa batu wasani zikaha.

¹¹Wasaniha humo batu sispirikpo,
batu aty tohi tawahi Deus tuk mopykyryk tsihikik

¹²Kytsa sizubarêtsa Deus soho bo batu mytsaty mykaranaha.
Imysapybara zuba mozihihiknaha.

Batu aty tohi tsimysapyrêta. Suknihabyitsa.

13 Siharere batu imysapy. Siharerewabymybarêtsa.

Pibiyituhukunaha tu mybarapetu mynakaranaha
mysispihikbataikiknaha zuba.

14 Sisakparênikitsa tu ustsá kytsa mysimyiájaikiknaha iwa motsasokonaha.

15 Mysisukyryknaha.

16 Ustsá kytsa namysapybyrikinaha nasimiyitsapyriwyknaha.

Kytsa mysitsapyriwyknaha.

17 Siakubyitsa tu ustsá kytsa mysiaknikinaha.

18 Deus humo batu simyharerewaby. Ihumo batu siakparawy.

Iwa maha — niy. Iwa Deus harere papeu humo mysoho nitsasoko.

19 Iwa Moises spirikpowy ziwatahaka. Ana papeu humo Sudeutsa Deus soho ty nisihyrinymyryky. Iwaze Sudeutsa batu tyso:

— Katsaktsa Moises spirikpowy humo yhȳ tsinakaranaha — maha.

Ana harere tyhi batu hȳ zikaha. Sudeutsabyitsa niwatihi iharere bo batu hȳ zikaha. Iwatsahi myzubaha tahaharere ty harapubeteke ba zikaha.

Sudeutsa Sudeutsabyitsa kino niwatihi tahaharere ty harapubeteke ba zikaha. 20 Iwatatu Deus batu ziky:

— O ikia Moises harere bo yhȳ tsimy iwatahi tsamysapyrêta tsmozik

— Iwa ba ziktsaso ba ziky. Atahi:

— Moises sopykwy tsipihyrinymyryky zeka amysapybyitsa tu tsimykara tsmoewy iwatahi kahumo aspirikporêta tsmozik — niy.

Hawa Deus okzeka mymysapyrêtsa tsmoziknaha.

21 Aba zuba hawa Deus humo mybarawy ezektsa simysapyrêtsa moziknaha nitsasoko. Deus hi:

— Ikiahatsa ahamysapyrêtsa tsmoziknaha. Batu Moises sopykwy humo ahamysapyrêtsa tsmoziknaha ba zikaha — niy. Ana kino botu Moises nisihyrinymyry. Tubabatu Deus sohokotsa kino niwatihi atsatu nisihyrinymyryky. 22 Deus hi:

— Asa zuba Sesus Kiristu harere bo hȳ mykaranaha asahi kaokzeka simysapyrêtsa moziknaha. Sudeutsa, Sudeutsabyitsa kino niwatihi Sesus harere bo hȳ mykaranaha zeka kaokzeka simysapyrêtsa moziknaha — my.

23 Batu aty tohi imysapyrênikita Deus wata my. Astsabanitsa mysapybyitsa tsmynakaranaha. Batu aty tohi Deus wata my. 24 Deus mymysapywyky. Mymysapybyitsa tu tsikykaranaha ana humo hi Sesus Kiristu nihyrikosokda atahi mysapyzekenziakse iwatsahi mysapybyitsa tsikykaranaha ana humo hi batu sinini tsmaha. Sesus Kiristu mysapyzekenziakse iwatahi Deus mype wasani tsmaha. Deus hi:

— Ikiahatsa Sesus Kiristu harere bo hȳ tsimykaranaha iwatsahi ahamysapyrêtsa tsmoziknaha — my. Iwa mymysapywyky atahi myhumo tsimypokzitsiarêta.

²⁵Deus hi Sesus Kiristu mybarawy bo zipheha. Mybarawy bo inasikze mybarawy ezektsa sapyzeken nihyrikosokda ana bo izumuze. Kytsa huak ty simysapybyitsa tu nikaranaha ana humo hi nihyrikosokda. Iwaze katsaktsa Sesus Kiristu harere bo hỹ tsimykaranaha mysapybyitsa tu tsikykaranaha Deus nimyokzohik h̃y. Sesus Kiristu nihyrikosokdaze iwa kytsa simysapyr̃etsa moziknaha, iwa Deus kytsa nisihyrinymyryky. Tubabatu Deus tsiakubyrisorokr̃eta tu simysapybyitsa tu nikaranaha sinini ykarawy bo ba ziksipeha. Tapetu isopyk:

— Bykyze katse babata sisapyzeken mohyrikosokda iwaze asaktsa kaharere bo hỹ mykaranaha sinini ykarawy bo ba mysipeha — my. ²⁶Abaka meky watu kytsa simysapybyitsa tu nikaranaha ana soho mytsaty mykara. Kytsa sizubar̃etsa bo simysapybyitsa tu nikaranaha humo ihuak ty sibo nyny my. Asaktsa Sesus harere bo hỹ mykaranaha simysapybyitsa tu nikaranaha batu mytsatyo ziky.

— Ikiahatsa kaokzeka ahamysapyr̃etsa tsmoziknaha katse babata ahasapyzeken nihyrikosokda iwatahi pahaokzohik — my. Iwa isipirikpor̃etsa mykaranaha.

²⁷Iwatsahi — katsaktsa wasani tsimaha — ba ziktsasonaha. Mysoho ba ziktsasoziukunaha batu aty tohi tsimysapyr̃eta my. Deus okzeka Moises sopykwy humo yh̃y tsimykaranaha iwaze — mymysapyr̃etsa tsimaha — batu zikaha. Katsaktsa Sesus humo zuba mymysapyr̃etsa tsimaha. Ata humo hi myspirikpor̃etsa tsmoziknahaze Deus mysoho tih:

— Asaktsa katse humo zuba simysapyr̃etsa moziknaha — my. ²⁸Katsaktsa Sesus harere bo hỹ tsimykaranahaze Deus okzeka mysapyr̃etsa tsmoziknaha. Katsaktsa Moises sopykwy bo yh̃y tsimykaranaha zeka Deus okzeka batu mysapy tsimaha. Iwa h̃y. ²⁹Deus Sudeutsa zuba ja iakparawy. Tozeka ja asa zuba mysisapywyky iwaze simysapyr̃etsa moziknaha. Batu ba. Deus kytsa sizubar̃etsa mywatuze Sudeutsa Sudeutsabyitsa bo kino niwatihi mysisapywyky, sizubar̃etsa Sesus harere bo hỹ mykaranaha zeka simysapyr̃etsa moziknaha. ³⁰Deus kytsa sizubar̃etsa bo mysisapywy tsihikik. Sudeutsa Sesus harere bo hỹ mykaranahaze iwatsahi simysapyr̃etsa moziknaha. Sudeutsabyitsa kino Sesus harere bo hỹ mykaranahaze iwatsahi simysapyr̃etsa moziknaha. Mekywatu moziknaha. ³¹Wastuhu kytsa ahatukze:

— Katsaktsa Moises sopykwy “O iharere mybo batu imysapy” tsimaha — iwa batu tyso, Sesus harere bo hỹ tsimykaranahaze Moises sopykwy humo niwatihi tsimyziwabykynaha.

Hawa Abarão nikara.

4 ¹Kyze Abarão soho bo mytsaty tsimaha. Atahi taparakta mydiri. Katsaktsa tsekokatsa tsimaha. Deus okezeka tsimysapyr̃eta niyzik ana hi motsasoko. ²Deus Abarão pe niy:

— Ikia tsimysapyrêta — niy. Atahi zisapywyky ja iwatahi Deus ipe niy:

— Ikia tsamysapyrêta — niy. Batu ba. Nawa ha ty wasani nikara batu ana humo hi nitsasoko. Iwaze Abarão tapetu isopyk batu tyso:

— Utakta kamysapyrêta — my. Batu ziky. ³Hawa Deus okzeka tsimysapyrêta niyzik ana ka motsasoko. Atahi Deus harere bo hyÿ ziknakara iwatahi Deus okzeka tsimysapyrêta niyzik. Iwa Deus harere papeu humo botu isoho mybo ziwatahaka.

⁴Aty ipehatsa humo tarabaja mykara zeka ana humo hi ihuak ty okyrysarowaka ty nyny niy. Itarabaja humo zuba okyrysarowaka ty nyny niy. Wasani my. Deus iwa batu isopyk mykara. ⁵Atahi myhumo iakparawy iwatahi iharere bo hyÿ tsimykaranaha zeka mymysapywyky. Asaktsa pisapywykynahaze ana humo hi batu sisoho:

— Ikiahatsa ahamysapyrêta — iwa batu tyso. Batu ba. Asa zuba Sesus Kiristu harere bo hyÿ mykaranaha. Iwaze ispe my:

— Ikiahatsa Deus harere bo hyÿ tsimykaranahaze ana humo hi ahaspirikporêta tsimoziknaha iwatahi aha pe “tsahamysapyrêta” — my. Tapara simysapybyitsa tu nikaranaha iwatsatu Deus harere bo hyÿ mykaranaha tsahi Deus okzeka simysapyrêta moziknaha.

⁶Aty zeka Deus okzeka tsimysapyrêta, atakta tsakurêta hÿ. Ba zikmysapybyi iwatahi ja tsakurêta mopykyryk mytsaty ahabyita tsimykaranaha. Sesus harere bo hi hyÿ nikaraze tu iwatahi Deus ipe niy:

— Ikia tsamysapyrêta — nikara, ana harere humo hi tsakurêta niapykyryk. Taparakta mydiri Dawi atsatu nitsasoko:

⁷— Asaktsa Deus harere ibyky Moises ziwataha ana humo batu hÿ nikaranaha batu zikaha.

Asaktsa sisopyksapybyitsa tu nikaranaha Deus Sesus humo zuba nisiokzohik iwatsahi sakurêta.

Simysapybyitsa nikaranahaze ana hi Deus nispiriktsokda tawata iwatsahi sakurêta.

⁸Deus humo simysapybyitsa tu nikaranaha batu mytsaty ziky iwatsahi sakurêta.

Iwa Dawi taparakta mydiri botu nitsaso — Dawi niy.

⁹Paze ja asaktsa tahapiak zizyzyknaha asa zuba sakurêta. Batu ba. Kytsa kino niwatihi sipiakzyzykyhybyitsa sakurêta niyziknaha. Iwaze Abarão soho bo mytsatyo tsimahaktsa. Deus harere papeu humo isoho ziwatahaka:

— O Abarão Deus harere bo hyÿ ziknakara iwatahi Deus ipe niy: “Ikia tsasopyksapyrêta” niy. Iwa Deus harere papeu humo niy. ¹⁰Anaharere nitsasokoze Abarão ipiakzyzykyhybyita aibatohi zuba tapiakzyk — iwa nitsasoko. Iwatsahi mypiakzyzykwy humo kytsa sakurêta ba zikaha. Deus kytsa pe my zeka:

— O ikiahatsa ahasopyksapyrêta — my ana humo hi sakurêta.

¹¹Tapara Abarão Deus harere bo hyÿ nikara iwaze Deus ipe niy:

— Ikia tsasopyksapyrêta — niy. Bykyze zuba tapiakpezyk, Deus humo tspirikporêta iwatahi ityryktsa niyzik. Iwa tahi:

— Utakta Deus harere bo hỹ ikykara iwaze Deus kape niy: “Ikia tsasopyksapyrêta” — niy. Iwata Sudeutsabyitsa kino niwatihi sizyzykyhybyitsa tu Deus harere bo hỹ mykaranaha zeka Deus ispe my:

— Ikiahatsa ahasopyksapyrêtsa — my. Abarão Deus harere bo hỹ nikara Sudeutsabyitsa kino niwatihi Deus harere bo hỹ nikaranaha iwaze Abarão tahadiri wata niyzik. ¹²Sudeutsabyitsa sipiakzyzykyhybyitsa tu Abarão watsa maha. Sipiakyzykyhybyitsa tuze Deus harere bo zuba hỹ nikaranaha. Sudeutsa niwatihi Abarão watsa mozurukunaha Deus harere bo zuba hỹ mykaranaha iwaze Deus ispe niy:

— Kaharere bo hỹ tsimykaranaha zeka ahasopyksapyrêtsa — my. Asahi mydiri Abarão watsa maha.

Abarão Deus harere humo hỹ ziknakara.

¹³Tubabatu Deus Abarão pe:

— Mybarawy ty abo nyny my. Atsekokatsa nanabyitaba sizubarêtsa hudikhudikwy pehatsitsa moziknaha — niy. Abarão ana soho bo hỹ niy. Batu sisopykwy bo pykyhy habiyitatu. Atahi Deus harere bo zuba hỹ nikara iwatahi Deus ihumo zisapywyky. ¹⁴Kytsa asahi sisopykwytza humo zuba pykyhytu yhỹ mykaranaha zeka ana humo hi Deus mysisapywyky iwa zeka mytsaty ahabyitsa tu mykaranaha. Kytsa Deus harere bo hỹ mykaranahaze isapyrênikia ty sibo nyny my. Iwa Deus mykara iharere wasani my.

¹⁵Aty Deus harere ibyky pykyhytu yhỹ mykara Deus okzeka tsimysapyrêta tawata my atahi batu imysapy my. Batu aty tohi iharere ibyky humo yhỹ zikaha. Iwatahi Deus batu iakparawy.

¹⁶Iwatahi Abarão Deus harere bo hỹ ziknakara ana humo Deus ipe niy:

— Utakta pasapywyky h̃y iwa mozihikik — niy. Deus nikaraze pasapywyky iwaze atsatu mykara. Iwatsahi kytsa sizubarêtsa Deus harere bo hỹ mykaranaha Abarão watsa iwaze Deus mysisapywyky. Abarão mydiri wata. Abarão Deus harere bo hỹ nikara, katsa kino niwatihi iharere bo hỹ tsimykaranaha, iwatsahi ihumo mspirikporêtsa tsimoziknaha.

¹⁷Tubabatu Deus tapetu nikara:

— Kaokzeka Abarão aparakbahazo wata my. Atakta kaharere bo hỹ mynakara asaktsa niwatihi nanabyitaba kaharere bo hỹ mykaranaha iwata moziknaha — niy. Iwa Deus Abarão bo mytsaty niy. Deus ba hawa tohi zikzukninaha. Siakbatsa mynasihyryzikpowy. Ana ty hi mybarawy isuknihybyize taharere humo inatakaha. Kyze Deus Abarão pe:

— Ikia izo tsimozik. Atsekokatsa sizubarêtsa maha. Kytza sizubarêtsa nanabyitaba ape mydiri mynakaranaha — niy. ¹⁸Kyze Abarão tapetu nikara:

— Hawa Deus kape niy atsatu mykara — nikara. Nitsaikbata tu ihyrytsa byita. Iwatatu ziperyikik Deus harere bo hyÿ nikara, iwaze Deus harere humo tatse ziperyky. ¹⁹Abarão nitsaikbata. Asiba sê anos niytyk tseheze itse nipuruk nitsaikbabaze. Ioke Sara kino niwatihi nitsaikbatatsa tu. Iwatatu tapetu ziknakara:

— O utakta katsebyita. Kaoke niwatihi itsaikbatatsa ba ziktabykyhy. Iwatatu Deus harere bo hyÿ mykara iwatahi katse mopuruk — niy. ²⁰Iwatahi batu tyso:

— Tozeka ja Deus katse kabo myzipeha ja — iwa batu tapetu ziknakara. Atahi:

— Utakta iktsaikba iwatatu Deus harere humo katse mopuruk. Deus pe niy “ikia zuba amysapyrënikita. Piksapywyikik” — nikara. Pibiyituhukutu Deus harere bo hyÿ ziknakara. ²¹Abarão hi:

— Kytza zikahabara ty atsatu Deus mykara, iwatahi izikwy humo katse mopuruk — my. Iwa tapetu ziknakara. ²²Iwatahi Deus ipe niy:

— O kaokzeka wasani tsimy — niy. Iharere bo hyÿ mykaraze tu Deus okzeka tisopyksapyrêta niyzik. ²³Deus harere papeu humo botu ziwatahaka:

— Abarão Deus okzeka tisopyksapyrêta — niy. ²⁴Ana harere myhumo kino niwatihi ziwatahaka. Taparaktza papeu humo ziwatahanahaze:

— Ikiahatsa ahasopyksapyrêtsa tsimoziknaha. Deus harere bo hyÿ tsimykaranaha zeka Abarão wata — iwa taparaktza nimyhyrinymyrykynaha. Deus humo Abarão oke tatse zipuruk.

Deus tse Sesus Kiristu inahyrizikpowy iwatsahi katsaktza iharere bo hyÿ tsimykaranahaze Deus mypehatsa mozik. Sesus Kiristu zihyryzikpowy ata bo hi hyÿ tsimykaranaha. ²⁵Deus tse Sesus Kiristu mybarawy bo inasik. Mysapybyitsa tu tsikykaranaha humo nihyrikosokda. Mysapy zeky nihyrikosokda ana hi. Myhuak niyzik, abaka mysapybyitsa tu tsikykaranaha katse humo mymokzohik. Deus zihyryzikpowyze mype my:

— Ikiahatsa Sesus harere bo hyÿ tsimykaranaha zeka katse humo ahasopyksapyrêtsa tsimoziknaha — niy.

**Deus harere bo hyÿ tsimykaranaha zeka ana
humo hi myspirikorêtsa tsimoziknaha.**

5 ¹Abaka katsa Sesus harere bo hyÿ tsimykaranahaze mykurêtsa tsimoziknaha. Batu paikpa mytsaty tsimykaranaha. Taparaka Deus myhumo taokaniki abaka mahani. Sesus harere bo hyÿ tsimykaranaha iwatsahi Deus harereziuwytza tsimoziknaha. ²Sesus Kiristu hi:

— Asaktsa kaharere bo hyỹ mykaranaha — niy. Iwaze Deus myhumo mymysapywyky iwatahi mymytsumuẽhĩkĩ iwa tsimyzurukunaha. Ana humo hi mykurẽtsa, aibatohi Deus watsa tsimoziknaha anahi taperykynaha.

³Abaka tsihokdaharẽna humo sinini tsimykaranaha zeka mykubyrisorokrẽtsa tsimoziknaha. Mypunihikrẽtsa tsimoziknaha. Iwatsahi mykurẽtsa hỹ. ⁴Mykubyrisorokrẽtsa zeka Deus mype:

— O ikiahatsa ahamysapyrẽtsa — my. Iwa myhumo mymybetesakaze. Iwatsa tsimoziknaha ana hi taperykynaha. ⁵Aibatohi Deus watsa tsimoziknaha anahi wasani hỹ. Ana hi taperykyze wasani mytsaty tsimykaranaha, Deus myhumo tsimpokzitsiukrẽta tahyrikoso humo kino mymyhyrinmyryky.

⁶Katsaktsa mysapybyitsa tsikykaranahaze Kiristu mypokzi mysapyzeyki nihyrikosokda. Nawa zuruze Deus botu ziwatawyze Kiristu nihyrikosokda. ⁷Batu aty tohi usta sapyzeyki ba zikyhyrikosokda. Aty zeka ja sisopyktsa pykyhytu yhỹ mykara tsihokdaharẽna isapyzeyki mohyrikosokda batu aty tohi mohyrikosokda tsihikik. Atakta ustsya kysa humo mysisyapywyikik tozeka ja aty zeka isapyzeyki mohyrikosokda.

⁸Kiristu ta meky watu my. Katsaktsa mysapybyitsa tu tsikykaranahaze iwaze hi Kiristu mysapyzeyki nihyrikosokda. Kiristu mysapyzeyki nihyrikosokda ana bo hi mytsaty tsimykaranaha. Deus myhumo tsimpokzitsiukrẽta babata ana humo hi myhyrinmyrẽtsa. ⁹Kiristu mysapyzeyki nihyrikosokda abaka iharereziuwyttsa tsikyzyknaha. Ihumo Deus mype:

— O ikiahatsa ahamysapyrẽtsa — mykara. Iwatahi Deus sinini ykarawy bo ba zikmypeha iwa hỹ.

¹⁰Tapara tuze katsaktsa Deus sukyrytsitsa tsikykaranaha. Abaka mahani. Katsaktsa iharereziuwyttsa tsimaha, Kiristu mysapyzeyki nihyrikosokdaze iwatsahi Deus harereziuwyttsa ihumo tsikyzyknaha. Abaka katsa Deus harereziuwyttsa tuze Kiristu ispitu niyzykzo mymytsumuẽhĩkĩ hỹ. Hawa mozihikik izikwy humo hi tsimykaranaha. ¹¹Sesus Kiristu mypokzi nihyrikosokda iwaze Deus harereziuwyttsa tsikyzyknaha. Ana humo kino Deus hi:

— O ikiahatsa kaharereziuwyttsa — niy. Iwatsahi mykurẽtsa hỹ.

Taparakta Adão Kiristu ahatsa soho mytsatyziu tsimykaranaha.

¹²Taparakta Adão Deus nizukni atahi isopyksapybyita nikaraze nihyrikosokda. Abaka katsa mywatu mysopyksapybyi humo tsimykaranahaze Adão watsa tsimyhyrikosokdanaha. ¹³Taparaktsa Deus harere ibyky Moises ziwataha humo sihyrinmyrybyitsa tu iwatsa hi sisopyksapybyitsa tu nikaranaha ana humo hi nihyrikosokdanaha.

¹⁴Iwaze mybarawy ezektsa sisopyksapybyitsa nikaranaha

nihyrikosokdanaha. Simysapybaratsa nikaranaha batu atsatu Adão sapybyri waka niy. Kytsa sizubarêtsa simysapybyitsa tu nikaranaha humo mohyrikosokdanaha.

Adão soho bo mytsaty tsimykaranaha. Itsekokatsa iwata sisopyksapybyitsa tu nikaranaha. Asaktsa Sesus Kiristu harere bo hyỹ mykaranahaze ityryktsa moziknaha iwata moziknaha simysapyrêtsa moziknaha. ¹⁵Asaktsa petoktsa meky watu maha, Adão Kiristu ahatsa. Adão estuba zubata atahi Deus harere bo batu hyỹ ziky iwaze isopyksapybyita tu nikara itsekokatsa kino niwatihi iwata sisopyksapybyitsa tu nikaranaha, iwatsahi sinini nikaranaha.

Kiristu ata zubata niwatihi atahi Deus harere bo hyỹ ziknakara. Deus imysapyrênikita tu isapyrênikia ty kytsa bo nyny isopyk. Mymysapywyikik. Atahi Kiristu mybo inasik mysopyksapybyitsa tu mykaranaha ihumo mymyokzohik. Iwaze Kiristu ata zubata tu nimysapywyiky atahi nihyrikosokda anahumo kino kytsa sizubarêtsa ihumo simysapyrêtsa moziknaha. ¹⁶Deus kytsa bo mysisapywyiky ahabo motsasoko. Kytsa sisopyksapybyitsa tu mykaranaha Adão humo ahabo motsasoko. Adão Kiristu ahatsa meky watu maha. Adão isapybyita nize Deus ipe niy:

— Kaokzeka batu amysapy — niy. Mybarawy ezektsa, Adão tsekokatsa tu simysapybyitsa tu mykaranaha iwatahi Deus ispe my:

— Kaokzeka batu ahamysapy tsimykaranaha — niy. Sisopyksapybyitsa tu nikaranaha iwatahi asaktsa Sesus Kiristu harere bo hyỹ mykaranaha Deus ispe my:

— Kaokzeka ahamysapyrêtsa — my. ¹⁷Taparakta Adão imysapybyita tu nikara. Itsekokatsa niwatihi iwata sisopyksapybyitsa tu nikaranaha. Iwatsahi mybarawy ezektsa mohyrikosokdanaha. Sesus Kiristu tsimysapyrêta tu nihyrikosokda. Iwatsahi ihumo Deus mymysapywyikik. Kytsa Sesus Kiristu harere bo hyỹ mykaranahaze Deus ispe my:

— Kaokzeka ahasopyksapyrêtsa — my. Iwatsahi asaktsa Deus tuk tahawahi mynapykyryknaha, Kiristu zikwy humo sipunihikrêtsa moziknaha.

¹⁸Iwaze taparakta Adão isopyksapybyita tu nikara. Deus harere bo batu hyỹ niy. Itsekokatsa niwatihi iwata sisopyksapybyitsa tu nikaranaha. Iwatsahi Deus ispe niy:

— Ikiahatsa batu ahamysapy iwatsahi ahawahi sinini tsimykaranaha — niy. Sesus Kiristu Deus harere bo hyỹ ziknakara iwazehi mybarawy ezektsa iharere bo hyỹ mykaranahaze Deus tuk tahawahi mynapykyryknaha. ¹⁹Estuba maku Adão inarokota Deus harere bo batu hyỹ niy. Iwatahi ihumo mybarawy ezektsa Deus okzeka batu simysapy niyziknaha. Adão watsa zimyikinaha. Sesus Kiristu atahi Deus harere bo hyỹ ziknakara. Iwatahi Deus kytsa sizubarêtsa pe:

— Kaokzeka ahamysapyrêtsa tsimoziknaha. Kaharere bo hyÿ tsimynakaranaha Kiristu watsa batu mymyiwy — my.

²⁰Tubabatu Moises Deus harere ziwatahaka. Ataharere humo Moises sopykwy nisihyrinymyry. Mybarawy ezektsa ana harere humo batu hÿ niaha, iwaze sisopyksapybyitsa naobaranaha. Kytsa sisopyksapybyitsa tu nikaranaha niubara iwaze Deus isapyrênikia kino niwatihi niubara. Atahi imysapyrênikita my.

²¹Iwaze mybarawy ezektsa sisopyksapybyitsa ziknakaranaha mohyrikosokdanahaze sinini ykarawy bo maha. Deus hi imysapyrênikita nimysapywyky, iwatahi Kiristu mybarawy bo inasik mysopyksapybyitsa tsimykaranaha Deus ihumo mymyokzohik. Mysopyksapybyiri tawahi tamoewy iwatsahi Sesus harere bo hyÿ tsimykaranaha zeka tsimyhyrikosokdanahaze Deus tuk mywahi tsimynapykyryknaha hÿ.

Mysopyksapybyika tamoewy. Deus harere bo hyÿ tsimahaktsa.

6 ¹Kyze mysopyksapybyitsa tu tsimykaranahaze iwa zeka Deus mymysapywytohi. Ana humo hi tozeka ja wastuhu kytsa tihi:

— Mysopyksapybyitsa tu tsimahaktsa kytsa! Iwaze Deus isapyrênikia ty mybo nyny my hÿ — maha. ²Nawa batu tyso. Nihyrikosokdata batu amy tohi ty ziky. Iwatsa katsa Sesus Kiristu harere bo hyÿ tsimykaranaha zeka mysopyksapybyitsa tu tsikykaranaha batu tsihik.

³Nimyharasusunahaze Kiristu tuk tsinapykyryknaha, iwatsahi iwata atsatu mytsaty tsimykaranaha ana hi ahahyrinymyrêtsa hÿ. Kytsa nimyharasusunahaze mysopyksapybyi tsmoewynaha, nihyrikosokdata wata mysopyksapybyity ka ba zikahazonaha. ⁴Nimyharasusunahaze:

— O hawa Kiristu mozihikik naha wa zuba hyÿ tsimykaranaha — maha ana hi ziwatawy. Kiristu nihyrikosokda izo hi nizihikik Deus zikwy humo inahyrizikpo. Iwata hawa Kiristu mozihikik ana humo hi hyÿ tsimykaranaha, iwaze mysopyksapybyiritsa tu tsimykaranaha tamoewynaha Sesus watsa mytsatizo, meky watu tsimyzurukunaha. Sesus zikwy humo meky watu tsmoziknaha.

⁵Kiristu mysapyzeken iharapatawyhyta humo nihyrikosokda. Ana hi nizihikik. Katsaktsa mysopyksapybyiwy tamoewyba. Ana hi tsimyzihihiknaha. Deus zikwy humo Kiristu inahyrizikpo. Katsa meky watu tsmoziknaha Sesus Kiristu zikwy humo mekywa tu tsimyzurukunaha. Ihumo zuba mysapyrêtsa tsmoziknaha.

⁶Tapara hawa ha ty batu imysapy tsikykaranaha. Abaka hawa haty imysapybara ty batu typeha zikaha. Mysopyksapybyitsa tu tsikykaranaha mysukatsihikrêtsa tsikaha. Abaka meky watu tsmoziknaha, meky watu tsimyzurukunaha tisapyrêna humo zuba tsimyzihihiknaha. Kiristu nihyrikosokdaze izikwy zuba mytuk mynapykyryk, izikwy humo zuba meky watu tsimyzurukunaha, katsaktsa tasapywyky myzo wata tsimaha.

⁷Aty mohyrikosokda zeka batu amy tohi bo mytsaty zikaha. Iwaze atakta nihyrikosokdaze, tasapybyi ty ziknakara batu ziky, imysapybara ba zikzihik.

⁸Iwatsahi Kiristu tuk tsinapykyryknaha. Kiristu mysapyzekenihyrikosokda iwahahi nizihikik. Katsakta mysopyksapybyitsa tu tsimykaranaha tamoewy tsihikik iwatsahi Kiristu tuk mywahi tsinapykyryknaha, iwa mytsaty tsimykaranaha. ⁹Kiristu nihyrikosokdaze petok zuruze Deus zihyrizikpowy. Abaka ba zikyrikosokdazo. Tawahi mynapykyryk. Ba hawa tohi zikzoninaha.

¹⁰Nihyrikosokdaze mysopyksapybyiwy ihumo nisiokzohik. Estuba zuba nihyrikosokda ba zikyrikosokdazo. Abaka Deus tuk tawahi mynapykyryk, Deus mozihikik naha ty zuba mynakara. ¹¹Iwatsahi ikiahatsa ahasopyksapybyiwy tsmoewynaha kytsa meky watu tsmoziknaha. Kiristu harere bo zuba hỹ tahaktsa ana humo hi mytsatyziyu taha!

¹²Iwatsahi imysapybara ba zikzihiknaha. Imysapybara bo ka mytsaty mytsaty byitaha! Batu tyso — Estuba zuba imysapybara piakpy tsihikik — iwa ba zikaha. ¹³Ikiahatsa Deus tyryktsa. Deus zuba ahapehakatsa. Iwatsahi ahasopyksapybyitsa tsimykaranahaze niwazuba pyktaha! Tapara imysapybara ty tsikykaranaha iwaze hi sinini tsikykaranaha. Abaka mekywa tu tsimyzurukunaha, Deus tuk ahawahi tsinapykyryknaha. Iwatsahi Satanas harere bo batu h̃y tsimaha. Mekywa tu tsimaha iwaze tu tyzisapywykynahaktsa! Ikiahatsa tihi:

— O Deus myzo ikia zuba tynamypehakakta. Ikia zuba tymytsumuēh̃kta iwaze azikwy humo wasani tsimyzurukunaha — tsimaha. Iwa Deus pe tsimahaktsa! ¹⁴Abaka Deus mype:

— Ikiahatsa ahasopyksapyr̃etsa — my. Iwa mybo motsasoko atahi mymysapywyky iwatsahi ihumo zuba wasani tsimykaranaha. Tapara katsakta Moises sopykwy bo yh̃y tsikykaranaha zeka iwa batu tyso. Iwaze Deus mymysapywyky ana humo hi Satanas harere bo batu h̃y mysopyk. Imysapybara ty ka ikiahatsa ba ziaksenaha.

Abaka Deus harere bo zuba hỹ tsimykaranaha.

¹⁵Katsakta Deus okzeka mysapyr̃etsa tsmoziknaha. Deus hi Kiristu zipedahik mybarawy bo inasik atahi mypokzi nihyrikosokda nawa Deus mybo zisapywyky. Moises sopykwy bo yh̃y tsikykaranahaze ana humo hi mysopyksapybyitsa tu tsikykaranaha, sisopykwy bo yh̃y tsikykaranaha. Abaka Sesus harere bo hỹy tsimykaranaha zeka ana humo hi Deus okzeka mysapyr̃etsa tsmoziknaha. Tozeka ja ana humo hi wastuhu kytsa tihi:

— Katsakta mysopyksapybyitsa tu tsimykaranaha zeka wasani tsimaha — iwa motsasokonaha zeka batu imysapy. ¹⁶Ikiahatsa aty bo tsimaha zeka:

— O ikia kapehatsa — tsimaha.

Yhÿ atakta ahapehatsa mozik. Iharere humo zuba ma tsimykaranaha. Batu petoktsa ahapehatsa, estuba zuba ahapehatsa. Aty zeka imysapybara ty myzihikik atsatu mykara, atahi mohyrikosokdaze sinini ykarawy bo my. Aty zeka Deus harere bo hyÿ mykara Deus ibo pisapywyky hawa tisapyrënikia ty mozihikik, iwatsahi wasani mykaranaha, mohyrikosokdanahaze Deus tuk tahawahi mynapykyryknaha. Anaharere botu ahahyrinymyrëtsa batu petoktsa ahapehatsa ana humo hi mytsatzyiutahaktsa kytsa tsimaha.

¹⁷Taparaka mysapybyitsa tu tsikykaranaha batu pyk tsikaha. Iwaze Deus soho wasania ty tsiwabynaha. Tsiwabytokto nahaze ana myhyrinymyrywy wasani baba iwatsahi hyÿ tsikykaranaha. Iwaze Deus pe:

— O ikia zuba amysapyrënikita — tsimykaranaha. ¹⁸Deus zikwy humo amy ty sa tisapyrënikia ty zuba tsimyzihikiknaha. Deus zikwy humo imysapybara tamoewynaha. ¹⁹Taparaka tsikmysapybyrikinaha. Imysapybara ty tsikykaranaha. Abaka Deus okzeka ahamysapyrëtsa tu iwatsahi isapyrënikia ty zuba tsimykaranahaktsa!

²⁰Tsipimiywynahaze batu wasani tsimyzurukunaha. Ahamysapybyitsa tu tsikykaranahaze Deus harere bo ma ahabyitsa tsikykaranaha. ²¹Tsimysapybyikinahaze imysapybara ahahuak mozik. Imysapybyikia ty zuba tsipiaksenaha. Kytsa simysapybyikitsa sinini ykarawy bo maha. Iwatsahi ahamysapybara humo mytsaty tsimykaranahaze ahasikpybyrëtsa tsmoziknaha.

²²Abaka meky watu tsimaha. Deus hyrikoso botu ahatuk mynapykyryk iwatsahi ahamysapybyitsa tu tsikykaranaha ba ziktsihiknaha. Imysapybara humo kazekta niwazuba Sesus Kiristu wata tsmoziknaha ana hi ahahuak mozik. Tsimyhyrikosokdanahaze Deus tuk ahawahi tsimynapykyryknaha.

²³Asaktsa sisopyksapybyitsa mynakananaha humo mohyrikosokdanahaze Deus tuk ba zikokpykyryknaha, sisapy metutu batu Deus tuk zikaha. Ustsaktsa Sesus harere bo hyÿ mykaranaha Deus tuk tahawahi mynapykyryknaha. Simysapyrëtsa iwaze Deus mysisapywyky ana humo hi ituk mynapykyryknaha. Asahi Sesus Kiristu tuktsa iwata mytsaty mykaranaha. Iwaze Deus kytsa bo mysisapywyky. Sesus namy huak mahaka kytsa ba kôpara zikaha, Deus hi Sesus tuktsa bo nyny isopyk ituk tahawahi mynapykyryknaha.

Maku tasukzazeky ana humo hi mymyspirikpowyky.

7 ¹O katukytsa aokze tuze zuba mybarawy ezektsa sopykwy ty yhÿ tsimykaranaha. Tsimyhyrikosokdanaha zeka sisopykwy bo batu hÿ zikaha. Ana humo hi ahahyrinymyrëtsa.

²Iwa wytyk ipytsakatatsa tuze tabarikta tuk napykyryk, ibarikta atatu zeka atatsa kino ituk napykyryk. Iwa mybarawy ezektsa sopykwy. Ibarikta mohyrikosokda zeka meky watu maha. Atatsa haramukuka mozik iwatatsatu mektatu piakse wasani my. Mybarawy ezektsa sopykwy.

— Ikia usta maku piakse wasani my — maha. ³Atatsa ibarikta atatu zeka mektatu ba ziaksenaha, pihuahua zeka mybarawy ezektsa sopykwy tihi:

— Atatsa batu imysapy — maha. Ibarikta mohyrikosokda zeka mektatu piakse zeka wasani my. Ibo tahyryzikwy zeka mybarawy ezektsa sopykwy humo wasani my.

⁴O katukytsa ikiahatsa atatsa watsa tsimaha. Tapara ikiahatsa hi:

— Deus harere Moises sopykwy bo yhȳ tsikykaranaha iwatsahi mysapyrëtsa — iwa mytsaty ahabyitsa tu tsikykaranaha. Ana harere batu wasani my. Moises sopykwy bo hȳ batu zikaha iwatsahi iharere tsmoewykbaiknaha atatsa watsa. Atatsahi ibarikta nihyrikosokdaze zerekik iwaze usta tuk mynapykyrykze wasani my. Abaka ikiahatsa Sesus tuk mynapykyryk ihumo ahamysapyrëtsa tsmoziknaha. Atahi mysapyzeken nihyrikosokda, iwatsahi iharere bo zuba hȳ tsimykaranaha, ihumo mspirikporëtsa tu zeka mysapyrëtsa tsmoziknaha. Iharere bo zuba hȳ tsimykaranaha iwaze usts kyttsa bo izikwy humo tysisapywykynaha.

⁵Taparaka nawaha zuba katsaktsa tsikzihikiknaha atsatu tsikykaranaha. Mybo zuba mytsaty tsikykaranaha. Deus harere tsiwabynahaze imysapybara humo tsinymyrykynaha. Iwatsatuze mysapybyitsa tu tsikykaranaha Deus mytuk ba zikykyryk, sinini ykarawy bo tsimaha.

⁶Tapara Moises sopykwy bo yhȳ tsikykaranahatsa watsa katsaktsa ana kino iharere bo hȳ batu zikaha. Abaka Deus namykse, iwatsahi izikwy humo Deus harere bo hȳ tsmynakaranaha. Mkywatsatu tsmoziknaha Deus hyrikoso mytuk mynapykyryk. Iwaze Deus mozihikikze ana ty hi yhȳ tsimykaranaha ihyrikoso humo. Moises sopykwy ana kino Deus harere ibyky papeu humo botu ziwatahaka ana humo ka batu hȳ tsimaha, ana humo hi simysapybyitsa nikaranaha.

Moises Deus harere ibyky ziwataha ana humo nimyspirikpoko.

⁷Tozeka ja wastuhu kytsa tihi:

— Moises sopykwy, Deus harere ja. Hawa sa Moises nimyhyrinomyky batu sapy ja — maha. Batu ba. Iwa batu tyso. Ana harere humo hi Deus okzeka batu sapy nimyhyrinomyky. Deus harere Moises ziwatahaka:

— Usts nama humo ahazokdibyrhuktsa — my. — Usta nama ty mozihikik zeka ana harere bo hi mytsaty mykara, hawa batu imysapy mykara pihyrinomyky. Moises sopykwy humo kspirikporëta.

⁸Ana watahaha zinyze ustsá kytsa namy mozihikik zeka Deus okzeka batu imysapy. Iwatatu usta namy ikzihikik ana watahaha humo hi. Ana harere tisapyrēna iwaze hawa Deus okzeka batu kasapy pikwatawy. Deus harere tisapyrēna. Amy ty sa mozihikik ana ty hi batu imysapy. ⁹Taparaka Deus harere humo batu kahyrinymyry mytsaty habiyita ziknakara.

“Utakta Deus okzeka kamysapyrēta” — ziknakara. Kyze iharere humo ikspirikpokoze amy ty batu imysapy kahyrinymyrēta. Iwaze kapetu kasopyk:

— O utakta kamysapybyita tu mykara. Deus okzeka batu imysapy — ikykara. ¹⁰Deus harere mybo nitsasoko iwaze mymytsumuēhīki iharere humo hỹ tsimykaranaha zeka mywahi ituk tsimynapykyryknaha. Ana harere humo hi kapetu kasopyk:

— Utakta kamysapybyita tu ikykara iwatahi Deus tuk kawahi ba zik kapykyryk. Kamysapybyita tu ziknakara ana humo hi Deus tuk ba zik kapykyryk — ikykara. ¹¹Taparaka katuktu zuba mytsaty ziknakara:

— Utakta kamysapyrēta — mybarapetu ikykara. Kamysapybyita tu ikykara. Kapetu kasopyk zeka kamyspihikbatarēta mykara. Kyze Deus harere ty zinymyrykyze kamysapybyita tu ikykara ana humo hi kahyrinymyrēta ikyzik. Kamysapybyita tu ikykara Deus tuk kawahi ba zik kapykyryk zinymyryky.

¹²Iwaze Deus harere ibyky anatyhi Moises ziwataha isopykwy wasani my. Anahi mybo nizapiksoko Deus harere my. Ana harere humo hi amy ty wasani mymywatawyky iwatahi kytsa mysitsumuēhī. Ana harere hi isapyrēnikia h̃y. ¹³Aty zeka ja:

— Ana harere humo Deus tuk kawahi ba zik kapykyryk kamysapybyi humo iwatahi iharere batu imysapy — my. Deus harere isapyrēnikia zuba. Ana harere humo mybarawy ezektsa simysapybyitsa tu nikaranaha soho mysihyrinymyryknaha. Kytsa ana harere tyhi sihyrinymyrybyitsa tu iwatsahi tahapetu sisopyk:

— Katsaktsa mysapyrētsa tsimykaranaha — mytsaty ahabyitsa nikaranaha. Utakta Deus harere iwabyze kapetu kasopyk:

— Utakta Deus okzeka kamysapybyita tu ziknakara — iky.

Moises Deus harere ibyky ziwatahaka naha humo mytsatyziyu ikykara.

¹⁴Kyze tubabatu Deus harere ty mybo niy. Ihyrikoso humo iharere ziwataha. Deus harere ibyky Moises nimyspirikpoko. Anatyhi isapyrēnikia ty tsipinymyryknaha. Utakta zuba batu kamysapy mynakara, kasapybyita tu mynakara. Amy ty sa batu imysapy ana kino yh̃y mynakara iwatahu batu ity tsihik. Tabo zuba mykara zeka iwaze Deus hyrikoso bo batu h̃y ziky. ¹⁵Amy ty batu imysapy mykaraze kapetu kasopyk:

— Amy skaraba kamysopyksapy mykara. Ana kino batu ity tsihik — my. Kamysapybyita tu mykaraze kapetu kasopyk:

— Amy skaraba ana ty hi iky. Isapyrēnikia ty zuba kakparawy, iwatatu batu kamysopyksapy iky — my. ¹⁶Iwatahi kamysopyksapybyita tu kapetu kasopyk:

— Utakta kamysopyksapybyita tu Deus harere zuba tisapyrēna — mykara. Amy skaraba batu imysapybara hỹ mozihihikize anatihi mykara. ¹⁷Amy skaraba batu imysapy batu ity tsihik. Hawa mozihihikize wasanikia ty ana kino kakparawy. Iwatatu hawaha batu imysapy mykara. Wasanibyikia ty yhỹ ikykara iwatahi pimysapybyriwyky. ¹⁸Uta pisapywy tsihikik batu ziky. Hawa wasanikia ty mozihihik batu ziky. Isapyrēnikia batu katuk my. ¹⁹Wasaniha ty mozihihik. Kyze imysopyksapy mykara. Hawa wasanibyikia ty batu ity tsihik iwatatu atsatu mynakara. ²⁰Hawa mozihihik ana humo hi batu mynakara. Amy humo wasanibyikia ty katuk mynapykyryk ana humo hi kamysopyksapybyita tu ziknakara.

²¹Iwaze wasanikia ty mozihihik zeka ana kino batu ziky. Wasanibyikia ty zuba mynakara. Iwa mozuruku. ²²Uta hiba Deus harere humo kakurēta mynapykyryk. ²³Pisapywy tsihikikta tu imysapybara ty zuba mynakara. Imysapybara zuba katuk mynapykyryk iwatahi kamysapybyita tu mynakara. Kapunihikbyita iwatahi yhỹ zuba kasopyk. Iwatahi batu kaku. ²⁴Kasukatsihikrēta hỹ.

— Aty sa piktsumuēhĩ. Utakta sinini ykarawy bo my. Aty sa pikykse — mykara.

²⁵Sesus Kiristu mypehakatsa pikykse hỹ. Ata hi ipunihikanikita, iwatahi izikwy humo kapunihikrēta mozik. Iwaze uta Deus pe my:

— O ikia zuba amysapyrēnikita — mykara. Uta zubaze imysapybara ty zuba mynakaraze, Kiristu zikwy katuk byizeka imysapybara ty mynakara.

Utakta Kiristu zikwy humo Deus harere bo hyỹ mynakara, iwaze imysapybara humo ka ja katy peha peha byity. Niwazuba mynakara.

Deus hyrikoso mytuk mynapykyrykze meky watu tsimyzurukunaha.

8 ¹Iwatsahi abaka asaktsa Sesus Kiristu zikwy humo mozurukunaha simysapyrētsa moziknaha. Iwatsahi Deus batu sibo tyso:

— Sinini ykarawy bo pahapeha — iwa batu tyso. ²Deus hyrikoso pikpehaka iwaze izikwy katuk mynapykyryk, ihyrikoso pikpehaze ba zimi. Iwatahi wasanibara humo ka ja katy peha peha byity. Deus sinini ykarawy bo ba zikpeha. ³Katsaktsa mypunihikbyitsa tu Deus harere bo batu yhỹ tsimykaranaha. Iwatsahi Deus okzeka batu imysapy hỹ, iharere bo ka batu hyỹ ziknakaranaha. Iwaze Deus tatse mybarawy bo zipaha, mywata niyzik. Atahi tsimysapyrēta mybarawy bo inasik mywata niyzik. Ata zuba mybarawy ezektsa tuk imysapyrēnikia ty ziknakara. Iwatahi

mysapyzeken nihyrikosokda. Mysapybyikitsa tu tsikykaranaha iwatahi nimysapyzeken abaka izikwy humo mysapybyikitsa tu tsikykaranaha tsmoewynaha. Ihumo batu mymyi.

⁴Deus iwa niy, imysapyrēnikia bo zuba tsimykaranaha. Abaka Deus zikwy humo iharere bo hyĩ tsimykaranaha. Ihyrikoso hi mytuk mynapykyryk iwatsahi Deus harere bo ma tsimykaranaha. ⁵Asaktsa taha bo zuba mytsaty mynakaranaha iwahi mozihikiknaha zuba mykaranaha. Utsaktsa Deus hyrikoso bo yhyĩ mynakaranaha Deus harere zuba mysipehaka iwa Deus mozihikik ana ty hi zuba mykaranaha.

⁶Asaktsa taha bo zuba mytsaty mynakaranaha sinini mykaranaha. Deus tuk ba ziktahasapynaha. Utsaktsa Deus hyrikoso mozihikik ana bo hi mytsaty mynakaranaha atahi mysiakuwyky. Ba paikpa mytsaty zikaha. Deus tuk tahawahi mynapykyryknaha. ⁷Aty zeka ta humo zuba mytsaty ziknakara zeka tsiakyriukrēta mozik. Deus harere bo batu hyĩ my ana harere bo ka ba hỹ ziky. ⁸Aty zeka tahumo zuba mozihikik ana ty hi mykaraze Deus ihumo batu iaku.

⁹Iwaze ikiahatsa hi Deus hyrikoso bo hyĩ tsimykaranaha. Iwaze hawa skaraba taha humo pahapehakanahaze batu hỹ tsmaha Deus hyrikoso humo pahatsumuēhikī. Deus hyrikoso ahatuk zikypykyk byizeka batu Deus hyrytsa zikyziknaha. ¹⁰Kiristu ahatuk mynapykyrykyk zeka ihyrikoso pahapehaka iwa ihumo meky watu tsmoziknaha. Ahamysapybyitsa tu tsikykaranaha anahumo hi tsimyhyrikosokdanaha iwatsatu Deus hyrikoso humo myspitu tsmozikzonaha. Iwa Kiristu nikara. Kiristu mysapyzeken nihyrikosokdaze Deus okzeka ahamysapyrētsa tsmoziknaha, iwatsahi Deus hyrikoso humo myspitu tsmozikzonaha. ¹¹Deus hi Kiristu zihyryzikpowy. Deus hyrikoso ahatuk mynapykyryk zeka tsimyhyrikosokdanahaze ana humo kino niwatihi mynamyhyryzikpowy Sesus Kiristu wata. Iwa my ihyrikoso humo, atahi ahatuk mynapykyryk. Izikwy humo mynury ezytyk mozikzo tsmaha.

¹²O katukytsa hawa Deus hyrikoso mozihikik naha humo tahaktsa! Deus mymysapywyky iwatsahi mysapybyiwy tsmoewynaha.

¹³Ikiahatsa ahabo zuba tsimynakaranaha zeka Deus tuk batu ahawahi tsimynapykyryknaha. Ikiahatsa hi ahape tu ahasopykze:

— Mysapybyitsa tu tsimykaranaha zeka Deus zikwy humo imysapybara tsmoewynaha — tsmaha. Iwaze Deus tuk ahawahi tsimynapykyryknaha. ¹⁴Asaktsa Deus hyrikoso mysipehaka iharere bo zuba hyĩ mynakaranaha asahi Deus hyrytsa babatsa maha. ¹⁵Deus hyrikoso inamykse. Ihyrikoso humo Deus myzo mozik, katsa ihyrytsa tsmoziknaha. Ana humo hi batu mypyby, batu ba, katsaktsa Deus pe mysopyk:

— O kazo ikia myzo babata — tsimykaranaha. Deus hyrikoso mytuk zeka iwa tsmymtsasonaha hỹ.

¹⁶Ihyrytsa babatsa tsimoziknahaze Deus pe:

— Myzo — tsimaha. Ihyrikoso atsatu mynakara. Atahi mype:

— Ikiahatsa Deus hyrytsa babatsa — mynakara. ¹⁷Iwaze katsa Deus hyrytsa tsimoziknahaze Deus isapyrēnikia ty mybo nyny my ihyrikyky wata. Deus isapyrēnikia ty Kiristu bo botu nyny niy. Katsa kino niwatihi Kiristu tuk isapyrēnikia ty mybo nyny my. Abaka kytsa humo sinini tsimykarana, asaktsa Sesus harere bo batu hỹ zikaha mymysukyrykynaha. Aiba zuba Kiristu atsaesubaha mysipehaka katsa kino niwatihi itukytsa mysipehana, batu sininizo zikaha.

Sesus Kiristu humo Deus tsizubarēna ty nizukni mymysapywyky.

¹⁸Katsaktsa mybarawy eze tu sinini tsimykarana. Aiba zuba mysapyrētsa tsimoziknaha hỹ. Batu amy tohi anawata hawa sinini tsiknakarana mopykbaik. Amy ty imysapynikia ty tsizubarēna ezytyk mozik. Iwatsahi batu paikpa mytsaty tsimahaktsa! ¹⁹Tsizubarēna Deus nizukni ana hi aparakbaha taperyky. Deus hi:

— O asaktsa kahyrytsa. Asahi katse babata watsa — my. Ana harere hi tapery.

²⁰Mybarawy Deus nizukni isapyrēna my kytsa humo zuba zimiywy. Aiba zuba mybarawy ezytyk mozik. Taparakta Adão isopyksapybyita nikara ihumo hi mybarawy zimiywy. Deus hi mybarawy nizukni Adão imysapybara humo batu imysapy niyzik. Iwatsahi tsizubarēna Deus nizukni taperykynaha. Deus mybarawy ezytyk mozuknizo ana hi taperykynaha. ²¹Katsaktsa Sesus Kiristu wata tsimoziknahaze mybarawy ezytyk mozik. Ba zikpyk isapyrēnikia mozik hỹ. ²²Abaka tsizubarēna Deus nizukni sinini mykara, batu ezytyk bara hi iwaha hi mybarawy wytyk watatsa, atatsahi tabykyhy piperykyze tsimyitsapyrētatsa. Itse mopurukze zuba tsakurētatsa mozik. Katsa kino niwatihi mybarawy ezytyk taperyky bykyze mykurētsa hỹ.

²³Katsa niwatihi tsiperykynaha. Deus myzo abaka katsa batu mymypykyhy, myraparētsa, myrapukrētsa imysapybara mytu mynapykyryk. Iwatsahi batu myku. Aiba zuba mykurētsa tsimoziknaha botu Deus mymysapywyky abaka Deus hyrikoso mytuk mynapykyryk atahi mymyhyrinyryky. Atahi:

— Aiba zuba Sesus Kiristu wata tsimoziknaha. Deus ahasoho “asaktsa kahyrytsa babatsa” my. Ahanury ty ezytyk ty ahabo nyny my — Deus hyrikoso my. Mekywatu tsimoziknaha. Iwa mymyhyrinyryky ana hi taperyky.

²⁴Deus inamykse. Iharere bo hỹ tsimykarana haze inamykse ata humo hi meky watu tsimoziknaha ana humo hi myhyrinyryrētsa hỹ. Abaka meky watu tsimoziknaha, aiba zuba Kiristu wata tsimoziknaha ana humo hi mykubyrisorokrētsa. ²⁵Zikozo naha bara zuba taperyky. Iwatsahi makubyrisorokrētsa tu Deus isapyrēnikia ty taperyky.

²⁶Mypunihikbyitsa tu Deus hyrikoso mytsyhyryze ibo mynapamykysoko. Katsakta mypetu mysopykze:

— Hawa sa Deus bo tsimypamykysokonaha. Amy sa ibo tsimyzapykynaha. Yh̃ ja — tsimaha. Iwaze Deus hyrikoso mytsyhyryze ibo mopamykysoko, katsakta Deus bo mopamykysonaha humo batu myhyrinymyry ana hi Deus bo mopamykysoko. ²⁷Deus koikny baktatu zinymyryba. Katsakta Deus hryrytsa tu ihyrikoso mytsyhyryze mopamykysoko. Mymykubyrivy na humo kino inymyryba, amyty Deus mybo myzinyny tsihikik ihyrikoso tsihyrinymyrëta. ²⁸Amy skaraba mybo mykara ana humo hi Deus mymysapywyky, iwatatu batu imysapybara ty mykara ana humo kino Deus namysapywyky, katsakta Deus humo mympokzitsirëtsa h̃. Tubabatu Deus nymywatawyhyk iwaze isoho bo hỹ tsimykaranaha. ²⁹Deus nanabyi ty tysuknihabyize hawatsa ihyrytsa moziknaha ana humo botu zinymyryba. Atahi:

— Kytsa sizubarëtsa katse babata tukytsa moziknaha. Atahi taparakta. Asakta katse babata watsa moziknaha. Utakta kytsa sizubarëtsa iwata mozihikik — niy. Iwatsahi katsa ihyrytsa tsmoziknaha h̃. Iwa nizihikik.

³⁰Asakta sakzohotsa ihyrytsa bo nisiwatawy. Siwatawyhytsa pe:

— Kaokzeka wasani tsimaha. Katse babata watsa tsmoziknaha. Katuk ahawahi tsimynapykyryknaha — my. Iwatsahi amy skaraba mybo mykara, ana kino mymysapywyky ihumo wasani my h̃.

Deus Sesus Kiristu humo tsimypokzitsiukrëta.

³¹Niwazubakta! Iwa mytsaty tsimykaranaha Deus isapyrënikia ty tsizubarëna mybo nyny my. Iwatsahi hawa tsimytsasonaha. Deus zikwy hi mytuk mynapykyryk, iwatsahi aty zeka mymykniki Deus zikwy humo batu ziky.

³²Deus hi tatse babata mybo zipeha mybarawy bo inasik. Mysapyzeky nihyrikosokda. Kytsa Kiristu zibezenhaze Deus yh̃ zuba niy, iwatahi Kiristu myhumo sinini nikara. Iwa niyze isapyrënikia ty tsizubarëna mybo nyny mykara h̃. ³³Deus watawyhytsa soho:

— Ikiahatsa kaokzeka ahamysapyrëtsa — mykara. Iwatahi batu aty tohi iwatawyhytsa soho ba zikmysapybyiki. Deus zikwy humo siharere pyk niy.

³⁴Batu aty tohi ba zikmyso:

— O ikiahatsakta ahamysapybyitsa tu tsikykaranaha ana humo hi tsimhyrikosokdanaha zeka wasani — my. Kiristu nawa mybo batu tyso. Atakta mysapyzeky nihyrikosokda, iwatsahi mysapybyitsa tu tsikykaranaha ty batu tywabyzo h̃. Deus zihyrizikpowy iwaze ituk tawahi mynapykyryk. Myhumo tsiharereziurëta, Deus bo mytsyhyryze mynapamykysoikik, iwaze Kiristu myhumo tsimypokzitsiarëta h̃. Iwatsahi batu aty tohi ahamysapybyitsa tu tsikykaranaha humo tsimhyrikosokdanaha zeka wasani my.

³⁵Kiristu mymypsapywyikik hỹ. Amy skaraba mybo mykara Kiristu myhumo tsimypokzitsiukrêta. Tozeka ja kytsa Kiristu harere bo batu hỹ zikaha mymyitsapyriwynaha. Mymymyijaikiknaha. Sihumo sinini tsimykaranaha. Myraparêtsa. Mynamybyikitsa. Asiba tsimyhyrikosokdanaha simypybytyrêtsa pokso. Mymybanaha. Iwa mybo mykaranaha zeka iwatawu Kiristu myhumo tsimypokzitsiukrêta. Katsakta:

— O Kiristu myhumo tsimypokzitsiukrêta hỹ — tsimykaranaha. Iwatsatu Deus tyryktsa sinini ziknakaranaha. ³⁶Deus harere papeu humo botu ziwataha:

— O Deus pibytuhukutu kytsa sakyriukrênikitsa
mymybakyzykynaha,
kytsa mymysukyryikiknaha.

Katsa hozipyrykzatsa watsa tsimaha.

Hawa kytsa hozipyrykzatsa mysibanahatsa watsa kytsa
mymybakyzykynaha.

Iwa mymysukyryikynaha — niy.

Ana kino botu ziwataha. Deus harere papeu humo ityryktsa soho ziwatahanaha.

³⁷Amy skaraba namypsapybyrikinahaze Deus hyrikoso humo mypunihikrêtsa tsimoziknaha. Kiristu myhumo tsimypokzitsiukrêta iwatsahi meky watu tsimoziknaha hỹ. Izikwy humo mypunihikrêtsa tsimoziknaha.

³⁸Deus mymypsapywyiky hỹ. Atahi myhumo tsimypokzitsiukrêta. Tsimyhyrizikosokzanaha zeka myhumo tsimypokzitsiukrêta. Myspituze myhumo tsimypokzitsiukrêta. Bijoikpe iknyktsa sipehatsitsa abazubatsa sizubarêtsa niwatihi bijoikpe eze tu iwa Deus mymypsapywyiky ba zikpyk. Abaka amy ty mybo mykara byriri kino niwatihi amy ty mybo mykara, Deus mymypsapywyikik ba zikpyk. Deus tawahi mymypsapywyiky hỹ.

³⁹Batu amy tohi mybarawy bijoikpe ba mekytu ziky Deus zuba mymypsapywyikik ba zikpyk. Pihik humo kino niwatihi ba mekytu ziky Deus zuba mymypsapywyikik ba zikpyk. Deus tsizubarêna nizukni iwatahi batu amy tohi ba mekytu ziky Deus zuba mymypsapywyikik ba zikpyk. Deus myhumo tsimypokzitsiukrêta babata. Katsakta Sesus harere bo hyỹ tsimykaranahaze iwatahi mymypsapywyikik. Katsakta Sesus tuk estuba zubata wata iwaze Deus tatse bo iktsa mynakaraze katsa kino niwatihi mybo iktsa mynakara iwatahi mymypsapywyikik. Iwatahi batu amy tohi ba mekytu ziky Deus myhumo tsimypokzitsiukrêta ba zikpyk.

**Deus myhumo tsimypokzitsiarêta ana tyhi katukytsa
mysihyrinymyryky. Aba Sesus harere bo batu hỹ nikaranaha.**

9 ¹⁻²Kyze utakta batu kaku. Katukytsa pokzi kasukatsihikrêta hỹ. Sudeutsa humo mopuziuku batu pyk icy. Wasani motsasoko. Sesus

harere bo hỹ mykara iwatahi batu mybarapetu kasopyk. Deus hyrikoso katuk mynapykyryk iwatahi batu kamyspihikbata. Iwatatu ahape:

— Sudeutsa humo kamypokzitsiarêta — my. Kaharere wasani mykara.
³O katukytsa pahatsumuêhĩ tshihikik iwatahi Deus pe:

— O kazo katukytsa humo kamypokzitsiarêta sipokzi utakta Kiristu tuk batu mynapykyrykyzyky iwa zeka sisapyzekenini mykara — my. Ana harere hi ba ziksitsumuêhĩ. ⁴⁻⁵Katukytsa Sudeutsa taparakta Isareu tsekokatsa tsimaha. Tubabatu Deus taparaktsa mydiritsa nisiwatawy. Abarão iwaze itse Isake inarokota iwaze Sako Isake tse iwatsa nisiwatawy. Asaktsa ityryktsa niyziknaha. Sibho hi Deus tazikwy ziwatawy. Ispe niy:

— Isapyrênikia ty ahabo nyny mykara. Ahahudikhudikwy ty ahabo nyny mykara. Ahatsekokatsa sizubarêtsa mynaubaranaha — niy. Aiba zuba iharere mypehatsa Moises bo nitsasoko, iwaze hawa sisopyk mykaranaha sihyrinymyrêtsa. Nawa Deus harere mysihyrinymyry mykaranaha zetu. Deus hi:

— Taparaktsa ahadiritsa Abarão, Isake, Sako iwatsa sihyrytsa ahaturytsa niyziknaha. Estuba zuba ahatsekokatsa tuk kapehata mozik, atahi kabo pahaoktyhyryk — niy. Kiristu Deus zipehata mybarawy bo inasikze Sudeu niyzik. Atakta imysapyrênikita tu iwata humo hi katsa:

— O ikia zuba amyharerewabyrênikita tsimaha h̃y. Ikiã zuba tsamysapyrêta tsimykaranaha. Ihumo kytsa sizubarêtsa Deus bo mykaranahaktsa! “O Deus ikia zuba amysapyrênikita” — mykaranaha. Iwa Deus Sudeutsa nisiwatawy.

⁶Hawa ha ty Deus nitsasoko atsa tu ty mykara. Iwatsahi batu tyso:

— Deus harere batu wasani. Sudeutsa sizubabyitsa zuba Deus harere bo hỹ mykaranaha, iwatsahi Deus humo batu siwatahawhy — iwa batu tyso. Taparakta Isareu tsekokatsa sizubarêtsa, Deus situk sizubabyitsa tu nisiwatawy ihyrytsa niyziknaha, ustsã kytsa kino niwatihi Deus nisiwatawy iwaze ihyrytsa niyziknaha. ⁷⁻⁹Abarão mydiri itsekokatsa sizubarêtsa. Deus okzeka batu sizuba itsekokatsa babatsa zuba Deus tyryktsa niyziknaha. Deus okzeka asaktsa Isake humoktsa Abarão tsekokatsa babatsa zuba, Deus tyryktsa niyziknaha. Tapara Deus Abarão pe niy:

— Usta mytyktseheze aoke Sara tabykyhy aibaeze zuba atse mopuruk h̃y — niy. Iwa Deus Abarão pe niy, iharere wasani niy. Abarão tse nipuruk, iwatsahi Abarão tsekokatsa sizubarêtsa tuze sizubabyitsa zuba Deus nisiwatawy ihyrytsa niyziknaha.

¹⁰Abarão tse Isake soho bo mytsaty tsimykaranaha. Deus Isake oke Hebeka bo nitsaso. Ana humo kino pahahyrinymyry Deus sizubabyitsa zuba nisiwatawy. Atatsã hi beketsã ty tabykyhyze iwaze beketsã nisipupuruk. Taparakta Isake hyrytsã niaha. Tapara nipurukta izo Esau

zinaropyk, ibete tatu nipurukta izo Sako zinaropyk iwatsa. ¹¹⁻¹²Tapara beketsa nipupuruknahaze Deus tihi:

— Iykpykbyita humo kamypokzitsiarêta. Taparakta taypykze iykpykbyita batu iakzoho. Iykpykbyita tsyhyryze tarabaja my — niy. Iwa Deus niy. Tapara sipupurukbyize asahi naka tisapyrêna iwaze naka mysapybara ahabyitsa tu mykaranaha. Tapara sipupurukbyize tu Deus estuba ziwatawyhik, iwa nizihikik hÿ iwatahi iykpykbyita ziwatawy. Hawa nikaranaha ana humo hi batu ziwatawy, estuba zuba ziwatawy iwa nizihikik. ¹³Deus harere papeu humo:

— Sako tsekokatsa nisiwatawy iky. Esau tsekokatsakta batu — niy. Iwatsahi Hebeka beketsa humo Deus soho tsinymyrykynaha.

¹⁴Aty ja:

— Estuba zubata Deus ziwatawy iwa batu wasani my — maha. Nawa motsasokonahaze batu imysapy my. ¹⁵Tubabatu Deus Moises pe niy:

— Aty humo zeka kamypokzitsiukrêta ata humo hi kamypokzitsiukrêta. Aty humo hi kamyzehikik zeka ihumo kamypokzitsiarêta hÿ — niy.

¹⁶Iwatahi amy ty sa tsimyzihikiknaha Deus batu ziky ana humo mymywatawy. Amy ty sa tsipisapywykynaha Deus batu ziky ana humo mymywatawy. Deus myhumo tsimypokzitsiukrêta iwa myzehikik. Hawa mozihikik naha humo zuba nimysapywyky. Iwa hÿ. ¹⁷Deus harere papeu humo iwatahaha, Deus Parao kytsa pehakatsa pe niy:

— Uta kahumo kytsa sipehatsa tsikyzyk. Kytsa sizubarêtsa tsiksipeha, kabo batu hÿ ziky. Kazikwy ty abo ziwatawy, iwatahi ikia humo kytsa sizubarêtsa kasoho humo sihyrinymyrêtsa. Utakta abazubata hi ba hawa tohi ziksukninaha ana ty hi zinymyrykynaha — niy. Iwa Deus harere papeu humo iwatahaha. ¹⁸Iwatahi asakta Deus iakparawy sihumo tsimypokzitsiarêta. Asakta iharere bo batu hÿ zikaha. Iwatsa batu ma zikaha.

Hawa Deus tatyryktsa tuk nikara.

¹⁹Deus nawa zeka aty ja kape my:

— Aty Deus harere bo yhÿ ahabyizeka iwaze Deus sinini ykarawy bo myzipeha zeka batu wasani my. Deus mozihikik ba hawa tohi zikaha tu atakta sinini ykarawy bo myzipeha zeka batu wasani my — tsimy.

²⁰— O kaharereziuwu iwa Deus bo batu tyso. Apetu ja asopyk. “Utakta myhyrizikwanita tuze iwaze Deus pisapybyiki.” Iwa batu tyso. Katsakta morosuk watsa batu ipokzitsi. Morosuk mozukni nahaze batu harere zeky “Iwa tsimyzuknikize batu wasani my” my. Iwa morosuk tsihita bo batu tyso my. Katsa kino niwatihi Deus pe iwa batu wasani my — iwa batu tyso.

²¹— Aty zeka morosuk mozuknize hawa mozihikik nahawa mozokniki. Aitsekni tsizubarêna zeka petok morosuktsa mysisukni. Estuba tisapyrêta mozik ustakta isapybyita eze natapatsikik tawahoro eze zuba mynakara.

22-24 Hawa Deus niy morosuk tsihitsa wata Deus Sudeutsa humo tsimypokzitsiarêta. Asaktsa iharere bo batu hỹ mykaranaha tazikwy ziwatawy. Asaktsa iharere bo batu hỹ mykaranaha iwatahi taokaniki. Ba zik tatsapusare, asaktsa iharere bo batu hỹ mykaranahaze ba zik simyitsapyriwy. Tsiakubyrisorokrêta ustsá kytsa kino nisiwatawy. Iwa myze Sudeutsa asaktsa iharere bo batu hỹ mykaranaha ba zik simyitsapyriwy. Katsaktsa ihyrytsa tsmoziknaha, asaktsa nisiwatawy. Wastuhu Sudeutsa ahamysapyrêtsa tsmoziknaha ana humo hi nimywatawy. Ustsá Sudeutsabyitsa kytsa sizubarêtsa ihyrytsa tsmoziknaha, sizubarêtsa nisiwatawy. — Deus tapetu nikara:

— Asaktsa katse babata harere bo hyỹ mykaranaha iwata simysapyrêtsa moziknaha. Asahi: “O Deus myzo ikia zuba amysapyrênikita, ikia zuba apunihkrênikita” maha. Iwa kabo mosakibazikiknaha — niy. Iwa sihumo tsimypokzitsiarêta hỹ. ²⁵Tubabatu Hosea Deus sohokotsa Deus harere papeu humo ziwatahaka:

— Taparaka asaktsa kahyrytsabyitsa tu abaka mysipeha “O katyryktsa tsimaha” pahawatawy iwatsahi katyryktsa tsmoziknaha.

Tapara asa humo batu kakparawy abaka ispe my: “Aahumo kamypokzitsiukrêta” my — niy.

²⁶Haneze Deus tihi:

— Ikiahatsa katyrytsabyitsa tsimaha.

Kyze anaeze ispe sopyk: “kahyrytsa tsimaha” my.

Deus koikny baktatu asahi kahyrytsa tsmoziknaha — niy.

Iwa botu Hosea ziwatahaka. Sudeutsabyitsa soho, hawa asa kino niwatihi Deus hyrytsa moziknaha.

²⁷⁻²⁸Isaijas Deus sohokotsa niwatihi nikara Deus harere papeu humo botu ziwatahaka:

— Taparakta Isareu tsekokatsa sizubarêtsa niobaranaha nimyra watsa maha.

Deus situk sizubabyitsa tu mysiwatawy.

Sizubarêtsa asaktsa Deus harere bo batu hỹ zikaha mybarawy eze mysimyitsapyriwyky.

Batu imysapy tsimykaranaha zeka pahasininiwy — niy.

Nawa botu nitsaso atsa tu mykara. ²⁹Tubabatu taparakta Isaijas Deus harere papeu humo ziwatahaka:

— Deus mybarawytsa ba hawa tohi zikzukninaha.

Wastuhu mytukytsa nitarenaha niwa byizeka,

katsaktsa Sodoma ezektsa watsa,

asahi tahamysapybara humo niakbabaiknaha

katsa kino niwatihi tsmokbanahatsa.

Komora ezektsa watsa niwatihi tsmokbanahatsa.

Sudeutsa batu sizuba Deus bo mysioқтыhyryk — niy.
Iwa Deus harere papeu humo botu ziwataha.

Deus wasania ty bo Sudeutsa batu h̄y nikaranaha.

³⁰Sudeutsabyitsa batu tahapetu sisopyk:

— Amy ty tsimykaranaha iwatsa tu Deus okzeka mysapyrētsa tsimoziknaha — iwa batu tyso. Asaktsa Sesus harere bo h̄y mykaranaha ana humo hi Deus tihi:

— Kaokzeka wasani tsimaha katse harere bo h̄y tsimykaranaha iwatsahi ahaspirikporētsa tsimypykyryknaha — niy. ³¹Sudeutsa tihi:

— O katsaktsa Deus sopykwy ty tsimykaranaha iwatahi Deus mymypeha: “Ikiahatsa ahamysapyrētsa” my — mytsaty ahabyitsa nikaranaha. Deus sisoho:

— Ikiahatsa ahamysapyrētsa — iwa batu tyso. Niwazuba iharere bo zuba batu h̄y zikaha, iwatsahi Deus harere bo batu h̄y mahaze Deus okzeka batu wasani zikaha. ³²Deus harere bo batu h̄y mahaze hawa wasani mykaranaha ana humo hi tapetu sisopyk Deus mype niy:

— O kaokzeka ahamysapyrētsa — iwa mytsaty ahabyitsa nikaranaha. Deus okzeka ata harere bo hi h̄y mykaranaha ana kino aba zuba my. Sesus Kiristu harere bo batu h̄y mahaze iwatahi Deus ispe my:

— Kaokzeka batu ahamysapy — niy. ³³Iwatahi Deus harere papeu humo:

— O kytsa mytsatzyiutahaktsa! Harahare wataty zik iky.

Ata humo hi Sudeutsa inarahanaha.

Kiristu hi harahare wata, asaktsa iharere bo h̄y mykaranaha batu sisikpyby

tahawahi Deus tuk mynapykyryknaha — niy.

Deus harere papeu humo niy.

— Asaktsa Sesus Kiristu harere bo batu h̄y maha asaktsa kytsa watsa asahi harahare bete inarahanaha.

Iwatsahi Sudeutsa Sesus Kiristu harere bo batu h̄y mykaranahaze

Kiristu sihumo harahare wata mozik,

iharere bo batu h̄y zikaha iharere batu siakparawy

iwatsahi kytsa watsa harahare bete inarahanaha

Iwa Deus harere papeu humo niy, hawa Sudeutsa sizubabyitsa Deus hryrytsa moziknaha.

10 ¹O kytsa! Deus katukytsa sihumo kamypokzitsiarēta mysitsumuēhī tsihikik. Deus bo mopamykysoikik:

— O myzo katukytsa tysitsumuēhīkīkta! Tysioқтыhyk — my. ²Deus mozihihikik ana humo hi pitsihikiknaha zuba batu zikaha. Sispirikpobyitsa tuze Deus okzeka wasani ha humo batu sihyrynymyry. ³Hawa mytsaty mykaranaha ana humo ka nikaranaha. Ana ty hi Deus okzeka wasani ja

mykaranaha iwa tahapetu sisopyk. Sispirikpobyitsa tu paikpa mytsaty wasani ja mynakaranaha iwatsa tu mybarapetu sisopyk. Sesus harere bo hỹ tsimykaranaha zeka iwatsahi Deus okzeka mysapyrẽtsa tsimoziknaha ana ty hi batu h̃y zikaha.

⁴Kiristu zumuze Deus harere ibyky ana hi Moises ziwataha nepykbaik. Abaka Kiristu harere bo hỹ tsimykaranaha zeka iwaze Deus okze mysapyrẽtsa tsimoziknaha. Ana humo hi Sudeutsa batu h̃y zikaha.

**Deus myzubarẽtsa nimywatawy iwatahi
Sesus ibo mysioktyhyryk tsihikik.**

⁵Tubabatu Moises ziwatahaka, kytsa soho asahi isopykwy bo hỹ nikaranaha. Asa soho ziwatahaze:

— Ikiahatsa Deus harere ibyky Moises ziwataha tsizubarẽna bo hỹ tsimykaranaha zeka iwaze Deus okze ka wasani tsimyzurukunaha, ahawahi ituk tsimynapykyryknaha. Iharere humo estuba zuba yh̃y ahabyi zeka batu wasani tsimyzurukunaha iwatsahi Deus tuk ba ziknapykyryk. Iwa Moises sopykwy bo yh̃y batu zikaha — niy. ⁶Deus hi:

— Sesus Kiristu harere bo hỹ tsimykaranaha zeka ahamysapyrẽtsa tsimoziknaha iwa kaokze ka wasani tsimaha — niy. Wastuhu ahatuktsa:

— Batu zikaha! Batu aty tohi bjoikpe bo iwaze Kiristu ba zikziokty. ⁷Batu aty tohi siakbatsa sapy bo iwaze Kiristu mybarawy bo ba zikzioktyhyryk. Katsa iwa batu zikaha.

Kiristu botu mybarawy bo inasik, mysapyzeyky botu nihyrikosokda. Atahi mytuk mynapykyryk. ⁸Deus harere papeu humo botu ziwatahaka:

— Kaharere bo hỹ tsimykaranaha zeka kaokzeka ahamysapyrẽtsa tsimoziknaha. — Anaharere humo kino:

— Kaharere bo hỹ tynakaranahaktsa! Ana kino botu tsiwabynaha. Ana humo kino botu mytsaty tsikykaranaha — niy. Iwaze ahabo tihi:

— Kiristu harere bo hỹ tahaktsa! — my. Kaharere awa tu ahabo motsasokozo. ⁹Kytsa aparakbaha bo ikiahatsa tihi:

— Sesus Kiristu mypehaktsa — tsimaha. Ana harere tsimytsasokonaha zeka Deus pahabetesaka. Deus Kiristu zihyryzikpowy ata harere bo hỹ tsimaha zeka Deus pahabetesaka h̃y, iwa Deus bo pahaoktyhyryk. ¹⁰Katsaktsa Sesus harere bo hỹ tsimykaranahaze Deus mype niy:

— Kaokze ka Kiristu humo ahamysapyrẽtsa tsimoziknaha — my. Tsimytsasokonaha zeka Sesus Kiristu mypehaktsa my iwazeka Deus mobetesaka, mymysapyrẽtsa tsimoziknaha. ¹¹Deus harere papeu humo iwatahaha:

— Aty zeka Sesus harere bo hỹ mykara atakta batu sikpyby ihumo tspirikporẽta mozik — niy. ¹²Kytsa sizubarẽtsa iharere bo hỹ mykaranaha tsahi batu sisikpyby. Sudeutsa Sudeutsabyitsa kino

niwatihi asaktsa Deus okzeka astsabani maha. Sizubarētsa Sesus humo sispirikporētsa moziknaha. Asahi:

— Ikia zuba mypehakatsa — mykaranaha. ¹³Deus harere papeu humo iwatahaha:

— Aty zeka Deus bo myzapykyky zeka: “O tsipliksumuēhĩ” atahi Deus piwaby tahi pioktyhyryk, kytsa sizubarētsa Deus bo mysioktyhyryk — niy.

¹⁴Iharere mywaby byizeka batu Deus pe:

— O tsipliksumuēhĩ — Deus wasania ty tywaby ahabyizeka batu iharere bo yh̃ tsikaha. Ustakta Deus wasania ty tyso byizeka ba ziwabynaha. ¹⁵Deus ykzohotsa sipeha ahabyizeka iharere ba ziktsasonaha. Deus harere papeu humo iwatahaha:

— Deus ykzohotsa humo mozumukunaha, iwaze wasania ty motsasokonaha ana humo hi mykurētsa h̃y — niy.

¹⁶Iwaze — Deus wasania ty nitsasokonahaze sizubabyitsa tu iharere bo hỹ — nikaranaha. Iwa tubabatu Deus sohokotsa Isaijas botu ziwatahaka. ¹⁷Kytsa Deus wasania ty piwabykynahaze iwaze zuba asaktsa iharere bo hỹ mykaranaha. Iwaze ana harere humo sispirikporētsa moziknaha. Kiristu soho piwabykynahaze iharere bo hỹ mykaranaha iwatsahi ihumo sispirikporētsa moziknaha.

¹⁸Kyze aty zeka:

— Sudeutsa Sesus harere bo batu h̃y mykaranaha. Tozeka ja Deus wasania ty batu waby. Batu ba, Deus wasania ty ziwabykynaha h̃y. Deus harere papeu humo iwatahaha:

Nanabyitaba kytsa sizubarētsa Deus soho humo sihyrinymyrētsa niapykyrykna.

Mybarawy ezektsa sizubarētsa hudikhudikwy ezektsa iwatsa siharere ziwabynaha — niy.

Iwa Deus harere papeu humo iwatahaha.

¹⁹Aty zeka ja:

— Isareu tyryktsa sihyrinymyrybyitsa watsa — my. Batu ba. Sihyrinymyrētsa hi. Kiristu soho sihumo batu ihokdaha. Taparakta Moises Deus tsyhyryze tihi:

— Ikiahatsa Sudeutsa tsimaha.

Deus ustsya kytsa mysiwatawyze sihumo ahazokdiharētsa tsimoziknaha.

“Katsa zuba Deus hyrytsa” tsimykarana paikpa mytsaty tsimykarana

iwatsahi Sudeutsabyitsa asaktsa sihyrinymyrybyitsa tu mysiwatawyze

iwaze sihumo ahazokdiharētsa tsimoziknaha — niy.

Iwa Deus harere papeu humo botu iwatahaha.

²⁰Taparakta Isaijas Deus sohokotsa isikpybybitatu Deus tsyhyryze:

— Asaktsa katy beri ahabyitsa iwatahi sibo kahazuba iky,
asaktsa batu katy sapyky ahabyitsa tu sibo utatu ikwatawy — niy.

Iwa tubabatu taparakta Isaijas ziwatahaka.

²¹Isaijas Sudeutsa soho kino niwatihi ziwatahaka Deus tsyhyryze tihi:

— Pibytuhukunaha tu kaharere bo hȳ tsimahaktsa kytsa! mykara.
Ikiahatsa batu. Kaharere bo batu yhȳ tsikykaranaha — niy.

Iwa Isaijas niy.

Deus tatyryktsa Sudeutsa humo tsimypokzitsiarêta.

11 ¹Iwaze hawa skaraba my:

— Deus tatyryktsa Sudeutsa nisimoewy ja — my. Batu ba. Deus tatyryktsa Sudeutsa ba ziksimoewy. Uta hiba Isareu ezekta tu. Taparakta Abarão kadiri, utakta Bêsami tukytsa iknyta. Deus ba zikmoewy. ²Deus isuknihybyze Sudeutsa nisiwatawy iwatahi tatyryktsa ba ziksimoewy. Taparakta Erias Sudeutsa soho Deus bo zisapybyriki, ana harere Deus papeu humo ziwatahaka ana humo tsikspiriktsokdanaha ja. ³Deus sohokotsa Erias tihi:

— “O Deus sohokotsa nisibabaiknaha. Asapy haneze siraratsa wezowytsa zipaparabaiknaha hana bo ja isapy zuba. Uta zuba iktare. Asahi pikbeze tsihikiknaha” mytsaty ahabyitatu ikykara — niy. ⁴Hawa Deus Erias pe niy:

— O batu, ikia zuba kaharere bo hȳ tsimykara batu ba. Kytsa sizubarêtsa sete miutsa sipunihikrêtsa asa kino niwatihi deusbyitsa Bara inarokota iharere bo batu hȳ nikaranaha. Asahi kaharere bo hȳ mykaranaha. Utsa kytsa zuba Bara ikia deus my mytsaty ahabyitsa nikaranaha — niy. Iwa Deus Erias pe niy.

⁵Abaka Sudeutsa wastuhu kytsa Sesus harere bo hȳ mykaranaha. Tubabatu Erias okze tuze wastuhu kytsa Deus harere bo hȳ nikaranaha aba kino niwatihi Deus Isareu tsekokatsa nisiwatawy, sihumo tsimypokzitsiukrêta iwatahi nisiwatawy. ⁶Asaktsa taparaktas sopykwy bo yhȳ nikaranaha iwaha humo Deus batu isty watawy. Moises harere bo yhȳ nikaranaha iwa zikzurukunaha ana humo hi batu isty watawy. Batu ba. Sihumo tsimypokzitsiarêta ana humo hi nisiwatawy. Deus nisiwatawy zeka taparaktas sopykwy humo zuba zikzurukunaha, iwa zeka sihumo batu imypokzitsi.

⁷Niwazuba amy ty Isareu ezektsa ziberikinahaze ana hi batu ity kaha. Deus okzeka simysapyrêtsa niyzik tsihikiknaha batu simysapybyitsa tu nikaranaha. Batu sizuba Deus okzeka simysapyrêtsa niyziknaha asaktsa botu nisiwatawy. Hawa Deus okzeka kytsa simysapyrêtsa moziknaha ana hi wastuhu Isareu ezektsa piwaby tsihikiknaha. Utsaktsa Sesus harere humo batu sispirikpo iharere bo batu hȳ zikaha. Iwaze Deus tihi:

— Ikiahatsa kaharere bo batu hỹ tsimykaranaha — niy. ⁸Deus harere papeu humo sisoho ziwatahaka:

— Deus harere ziwabynahaze sibo tsihokdaharēna.

Simytsatyhybyitsa tu iharere humo batu sihyrinymyry.

Aba kino atsawatu iharere batu siwabyziu — niy.

⁹Taparakta Dawi niwatihi Deus harere papeu humo sisoho ziwatahaka:

— Asaktsa tahapetu sisopyk mybarapetu mykaranaha.

Simyspihikbatanikitsa Deus mysizukutu iwaze wasani my.

Tahamyikaha burukze mahape myjaikiknaha mybarapetu mykaranaha.

Hawa sasabyitsa tahawerekywy bo mynapupunahaze tawata tahamyikaha pimiyikinaha.

¹⁰Sihyrizikubyitsa watsa mozurukunaha.

Deus batu mynyhy mykaranaha.

Asaktsa maku wata titsakyrirēta piskyrrik eze tawata mozurukunaha.

Deus mysitsumuēhī tsihikik asaktsa ipe: “O batu hỹ” mykaranaha Iwa Deus harere papeu humo ziwatahaka.

¹¹Iwaze Sudeutsa zimyikinahaze simysapybyitsa tu nikaranahaze jokboha zuba zimyikinaha. Sudeutsa mytsatasyk mykaranaha. Sudeutsa Deus harere bo batu hỹ nikaranahaze iwaze Deus Sudeutsabyitsa nisibetesaka. Sudeutsabyitsa Deus bo mysioiktyhyrykze Sudeutsa sihumo sizokdirētsa niyziknaha. Abaka Sudeutsabyitsa Deus bo mysioiktyhyryk ana humo hi sozeka ja Sudeutsa tihi:

— Katsa tihiktsa kytsa! Katsaktsa Deus bo tymyoktyhyryknahaktsa! Sudeutsabyitsa watsa — mykaranaha.

¹²Sudeutsa Sesus harere bo batu hỹ nikaranahaze Deus Sudeutsabyitsa tabo mysioiktyhyryk. Sudeutsa iharere bo batu hỹ mykaranaha. Iwatsahi Sudeutsabyitsa iharere bo hyỹ mykaranaha ihumo sispirikporētsa moziknaha. Deus nisisapywky aiba zuba Sudeutsa Sesus harere bo hyỹ mykaranahaze Deus isapyrēnikia ty myzubatsa bo nyny my hỹ.

Sesus Kiristu Sudeutsabyitsa Deus bo mysioiktyhyryk.

¹³Abaka Sudeutsabyitsa zuba motsasoko. Deus zikpeha my. Wasaniha ty ababo motsasoko ana humo hi zikpeha. Kahyrikosokzawy humo kakurēta mynapykyryk.

¹⁴— Tozeka ja kahyrikosokzawy humo katukytsa Sudeutsa ahahumo sizokdirētsa moziknaha iwaze situk wastuhu kytsa Deus bo mysioiktyhyryk. Tozeka ja ikiahatsa bo iktsa mahaze “O katsaktsa niwathiktsa” — maha ¹⁵Sudeutsa Sesus harere bo batu hỹ nikaranahaze sizubarētsa Sudeutsabyitsa humo ka wasani niy. Sudeutsabyitsa Deus harereziuwyttsa niyziknaha. Deus Sudeutsa mysiwatawyzoze kytsa

sizubarêtsa bo tisapyrêna hỹ. Sudeutsa iharere bo hyỹ mykaranahaze myzubatsa humo tisapyrêna. Sizubarêtsa bo pisapywyky hỹ. Aty zeka inahyryzikpo zeka tisapyrêna my nawata, Deus myzubatsa mysisapywyky hỹ.

¹⁶Atsikara estuba zuba Deus bo nyny my zeka nitare naha kino niwatihi wasani. Hwiharatatsa sisapyrêtsa zeka isarapatsa kino niwatihi sisapyrêtsa anahumo hi ahahyrinymyrêtsa. Taparaktsa Deus harere bo hyỹ nikaranaha sihumo tsimypokzitsiukrêta. Aba kino niwatihi kytsa iharere bo hyỹ mykaranaha sihumo tsimypokzitsiukrêta hỹ.

¹⁷Oriwereja soho bo mytsaty tsimaha, ihumo tsinymyrykynaha. Oriwereja wastuhu sarapatsa niakarakhaha. Kyze hwisarapatsa jakara iknykta mekta sarapa tu tasutsuk tsikykaranaha, aibani zuba tahapykynaha. Iwata Sudeutsa hwisarapatsa watsa asaktsa sikakarehetsa niaha. Sesus harere bo batu hỹ mykaranahaze tu Deus hyrytsa batu zikyzyknaha iwatsahi metutu tahasapynaha. Ikiahatsa Sudeutsabyitsa tu Sesus harere bo hyỹ tsimykaranahaze iwatsahi ihumo ahaspirikporêtsa tsimoziknaha, iwatsahi ikiahatsa hwisarapatsa watsa asaktsa jakara iknykta hwi humo nezutsukuk niy. ¹⁸Iharatatsa humo hwi taypyk. Batu sarapatsa humo hwi taypyk. Iwatsahi pykyhytutaha nawa tsimytsasokonaha. Batu tyso.

— O Deus Sudeutsa batu iakparawy iwatahi katsa zuba tsikmywatawy — iwa batu tyso.

¹⁹Ikiahatsa:

— Hawa katsa hwisarapatsa jakara iknykta hwi humo nezutsuk tsimaha, Deus Sudeutsa sapy mybo nyny mykara — tsimaha. ²⁰Wasape tsimytsasokonaha wasape my. Sudeutsa hwisarapatsa sikakarehetsa watsa Sesus harere bo batu hỹ zikaha. Ikiahatsa hi sisapy tsiapiaksenaha. Sesus harere bo hyỹ tsimykaranahaze ana humo hi sisapy tsiapiaksenaha. Pykyhytutaha kytsa! Batu tyso:

— Katsa zuba Deus hyrytsa tsimaha — iwa batu tyso. Pykyhytutaha! Sesus harere bo zuba hyỹ tsimykaranahaktsa batu pyk zikaha!

²¹Sudeutsa Sesus harere bo batu yhỹ mykaranahaze iwatahi Deus metutu nisisapyspyk niy. Hwisarapatsa sikakarehetsa watsa. Iwatuze Sudeutsa hwisarapatsa babatsa watsa. Ikiahatsa ja. Ikiahatsa iharere bo yhỹ ahabyizeka pahatryktsapyriwy. ²²Iwaze tsiwabytoktonaha! Sudeutsa Sesus harere bo batu hỹ mykaranaha iwaze Deus nisityryktsapyriwyky. Katsa tihi:

— O hawa Deus mykara wasani my — tsimaha. Deus Sudeutsabyitsa Sesus harere bo hyỹ mykaranahaze tu asa humo tsimypokzitsiukrêta hỹ. Katsa tihi:

— O hawa Deus mykara wasani my — tsimaha. O kytsa pykyhytutaha! Sesus harere bo yhỹ ahabyizeka ikiahatsa hwisarapatsa watsa

tsimoziknaha, asaktsa sikakarehetsa watsa niaha. ²³Sudeutsa Sesus harere bo batu hỹ niahaze hwisarapatsa watsa niyziknaha asaktsa sikakarehetsa hỹ niaha. Aiba zuba Sesus harere bo hỹ mykaranaha iwatsahi ihumo sispirikporëtsa moziknaha iwaze Deus hyrytsa mozikzonaha. Ana kino Deus zikwy humo batu ihokdaha.

²⁴Iwaze ikiahatsa Sudeutsabyitsa hwisarapatsa watsa jakara iknykta niaha, iwaze oriwereja hwi humo nezutsuk niy. Tapara ikiahatsa Deus hyrytsa yrik ahabyize. Abaka iharere bo hỹ tsimykaranaha tsahi ihyrytsa tsimoziknaha. Sudeutsa iharere bo hỹ maha zeka ihyrytsa mozikzonaha. Hawa hwisarapatsa hwi humo nezutsukze, Sudeutsa oriwereja sarapatsa watsa Deus hyrytsa mozikzonaha. Iharere bo hỹ maha zeka ihyrytsa mozikzonaha. Ana kino Deus zikwy humo batu ihokdaha.

Deus myzubatsa humo mysisapywyky.

²⁵O katukytsa pahahyrinymyry tsihikik Sudeutsa Kiristu harere bo batu hỹ mahaze tahaoktsispyknaha maha. Asaktsa Deus bo batu tyso mynakaranaha:

— O katsaktsa Sesus Kiristu harere bo batu hỹ tsimaha iwa batu hỹ tsimaha — maha. Iwa tawahi batu tyso.

— Deus ustsá kytsa Sudeutsabyitsa nisiwatawy. Asaktsa Deus bo mysioktyhyryknaha Sudeutsa Sesus harere bo batu hỹ zikaha. Iwa tubabatu Deus nizihikik. Ana humo hi batu myhyrinymyry. Hawa Sudeutsa Sesus harere bo hỹ mykaranaha batu myhyrinymyry. Abaka ahabo motsasoko ikiahatsa “O katsa zuba Deus nimywatawy ihyrytsa tsimoziknaha” — iwa batu tyso. Katukytsa mypehawy mytsaty mytsaty tsimahaktsa! ²⁶Sudeutsa sizubarëtsa Deus bo mysioktyhyryk. Tubabatu Deus harere papeu humo ziwatahaka:

— Mymyoktyhyrykta Siã ezekta.

Sako tsekokatsa Sudeutsa simysapybyitsa tu nikaranahaze nisiokzohik ispiriktsokdata wata.

²⁷Simysapybyitsa tu nikaranaha Deus nisiokzoba.

Hawa Deus botu nitsasoko atsatu mykara — niy.

Iwa Deus harere papeu humo botu ziwatahaka.

²⁸Aba Sudeutsa Kiristu harere bo batu hỹ maha iwaze Deus sukyrytsitsa niyziknaha. Wasaniha ty batu hỹspyk nikaranaha. Ana ty hi Sudeutsabyitsa mysitsumuëhĩ. Ana humo hi Sesus Kiristu harere bo hỹ tsimykaranaha iwatsatu Sudeutsabyitsa tsimaha. Tapara Deus Sudeutsa nisiwatawy ihyrytsa niyziknaha. Taparaktsa Sudeutsa Abarão, Isake, Sako iwatsa ispe niy:

— Ikiahatsa kahyrytsa tsimaha — niy. Iwatsahi Sudeutsa Deus harereziuwu, sihumo tsimypokzitsiukrëta hỹ. ²⁹Iwatahi Deus ba meky

watu ziksisapywy ba paikpa mytsaty ziky. Mytsaty mynakara tasopyk ty zuba mynakara. Tapetu isopykze:

— Asaktsa nisiwatawy, iwatahi mysisapywyky — my. Iwaze asaktsa nisiwatawy iwatahi mysisapywyky hỹ. ³⁰Iwatahi Deus ahahumo tsimypokzitsiarêta. Taparaka ikiahatsa iharere bo batu hỹ tsikykaranaha abaka batu. Abaka iharere bo hyỹ tsimykaranaha Sudeutsa iharere bo batu hỹ niaha, ana humo hi Deus ahahumo tsimypokzitsiarêta. ³¹Aiba zuba Deus sihumo tsimypokzitsiarêta aha watsa. Abaka Kiristu harere bo batu hỹ maha byri zuba niaha, iwatahi Deus sihumo tsimypokzitsiarêta.

³²Sudeutsa Sudeutsabyitsa kino niwatihi Deus okzeka sizubarêta iharere bo batu hỹ zikaha. Iwatuze Deus sizubarêta humo tsimypokzitsiarêta, Sudeutsa Sudeutsabyitsa humo kino niwatihi, nawatsa tu myzubahatsa humo tsimypokzitsiarêta mopykyryk.

Deus bo tsimysakibazikiknahaktsa.

³³O Deus bo tsimysakibazikiknahaktsa! Ipe tsimahaktsa!

— Ikia zuba amysapyrênikita. Ikia zubata tsamyhyrizikwyrêta. Batu amy tohi ahumo ihokdaha. Tsinymyryba. Hawa mytsaty tsimy kara katsaktsa batu myhyrinymyry. Hawa tsimyzuruku katsaktsa batu myhyrinymyry ikia zuba ahyrinymyrêta babata — tsimaha. ³⁴Deus harere papeu humo botu ziwatahaka:

— Batu aty tohi Deus bo zipeha my.

Hawa Deus mytsaty mynakara batu aty tohi zikmyhyrinymyry.

³⁵Batu amy tohi Deus bo nyny zikaha.

Batu aty tohi isapyrênikia ty ibo nynsypyk myze ba zikzihuak.

Tsizubarêna ituk — niy.

Iwa Deus harere papeu humo ziwatahaka.

³⁶Deus koikny baktatu tsizubarêna nizukni. Usa bo mytsaty niy ana hi nizukni. Iwatsahi mybarawy tsizubarêna kytsa myzubatsa kino niwatihi ipe mykaranaha:

— Ikia zuba wasani tsimy kara, ikia zuba tsamyhyrizikwyrêta — maha. Katsa niwatihi ibo tsimysakibazikiknaha!

— O ikia zuba amysapyrênikita. Ikia apunihikrênikita. Ba hawa tohi zikzuknina. Myokzeka ikia tsamyharerewabyrêta hỹ — tsimaha. Iwa hỹ.

Deus tsyhyryze hyrizikosokdawy tsimykarannahaze mykurêtsa tsimoziknaha.

12 ¹Iwatsahi katukytsa Deus tawahi mytuk mynapykyryk mymysapywykik iwaze — ikia zuba mypehakatsa — ipe tsimahaktsa! Amy ty sa mozihikik ikiahatsa tihi:

— Katsaktsa anatyhi tsimykaranaha, aharere bo zuba hyỹ tsimyzihikiknaha hỹ — tsimaha. Iwa tsimyzurukunaha zeka ahakurêtsa tsimoziknaha. Iwaze wasani tsimykaranaha.

²Mybarawy ezektsa sopyk tsmoewybaiknahaktsa! Hawa mytsaty tsimykaranaha Deus mekywaha tu mozihikik. Iwaze hawa Deus mozihikik tsipinymyrykynaha. Nawa wasani tsimykaranaha. Nawa tisapyrēnikia ty tsipinymyrykynaha. Hawa Deus okzeka tsimyzurukunaha ana humo hi tsipinymyrykynaha, hawa Deus mozihikik ana humo hi ahahyrinmyrētsa tsmoziknaha.

³Deus zikwy botu katuk mynapykyryk ihyriziktsokzawy humo. Ana tarabajawy humo hi wasania ty motsasokoro. Ana humo hi ahape:

— Ahatuk batu tyso “utakta abazubata” — iwa batu tyso. Ahasoho bo mytsatziutaha! Amy ty ihokdaha byizeka anaty kino tsimahaktsa! Tarabajazu tahaktsa. Deus hi ahyriziktsokzawy humo zahapeha. Amy skaraba ahatarabajawy Deus pahapeha, ana bo hi tsimahaktsa kytsa!

⁴Katsaktsa mynury nanabyi meky watu, mytsyhyrypetsa, mypyrytsa, myhyriziktsa, myhyrytsa iwatsa tsizubarēna tsimaha. ⁵Iwata katsaktsa Sesus harere bo hỹ tsmiykaranaha inury wata tsmoziknaha. Katsaktsa myzubarētsa tsimaha, hawa ha tsmiyzihikiknaha estuba zubata watsa atsatu mytsaty tsmiykaranaha. Amy ty Kiristu mozihikik ana humo hi tsmynakaranaha. Estuba estuba zuba tahahyrizitsokzawy humo mynakaranaha katsaktsa tsinaharapetsumuēhīkīnaha h̃y.

⁶Deus myhumo tsmypokzitsiarēta isapyrēnikia ty mybo nyny mynakara. Ihyriziktsokzawy humo izikwy mytuk mynapykyryk. Iwatsahi estuba estuba zuba izikwy mymypehaka ana humo kino tsimahaktsa! Wastuhutsa izikwy ty mynapykyrykze Deus wasania ty motsasozukunaha. Asaktsa wasania ty tytsasokonaha za. ⁷Utsa izikwy situk mynapykyryk iwatsahi Sesus tuktsa bo mysitsumuēhīkī iwaze asaktsa Sesus harere bo hỹ mykaranaha, asa bo hi tysitsumuēhīkīnaha. Utsa izikwy situk mynapykyryk iwatsahi Sesus tuktsa mysihyrinmyrynaha. Iwaze asaktsa Sesus humo sispirikporētsa. Asa bo hi tsihyrinmyrynaha. ⁸Utsa izikwy situk mynapykyryk iwatsahi sipehawy kytsa bo mynasiakuwyky. Asaktsa sipehawy tytsasokonaha. Utsa izikwy situk mynapykyryk iwatsahi sinamyrētsa moziknaha batu taha bo zuba mykaranaha, asaktsa Deus zikwy humo sinamybyitsa bo nyny mykaranaha. Utsa izikwy situk mynapykyryk iwatsahi kytsa humo mysipokzitsikinaha, iwaze asaktsa utsa kytsa humo tysipokzitsikinaha. Utsa simypokzitsiukbyitsa bo mysitsumuēhīkīnaha iwatsahi asaktsa sakurētsa Deus zikwy humo wasani mykaranaha.

⁹Tyharape pokzitsikinahaktsa! Iwa tsmiykaranaha zeka ba zikmyspihikbata. Isapyrēnikia ty ahakparawy! Ahasopyksapybyri tsmoewybaiknahaktsa! ¹⁰Ikiahatsa Sesus humo ahatukytsa tsimaha. Iwatsahi tyharape pokzitsikinahaktsa! Ahawahoro ezektsa watsa humo ahamypokzitsirētsa. Tyharape pokzitsinahaktsa. Iktsazubataha tsimahaktsa! ¹¹Deus harere bo yh̃ tahaktsa! Ihyriziktsokzawy humo

tsimykaranaha. Ahazikara byihu ja. Ahakurêtsa tu Deus harere bo yh̄y tahaktsa!

¹² Kiristu taperyky iwatsahi ahakurêtsaktsa! Utsa kytsa pahaknikinahaze ahapunihikrêtsaktsa! Deus bo typamykysoikiknahaktsa! ¹³ Utsa kytsa Sesus harere bo hȳ mykaranaha batu sinamyky ahanamy ty sibo tsibiaknaha nyny nyny tahaktsa! Ahabo mozumunaha zeka ikiahatsa tihi:

— Pany pakutynaha. Mytuk tyzadisahanaha. Kawahoro eze tu ahawanu tsihahañaha — tsimaha.

Kytsa sizubarêtsa mysipokzitsikinaha. Mysukyrytsitsa humo kino niwatihi tysipokzitsikinaha.

¹⁴ Asaktsa pahasukyrikiknahaze sitsyhyryze batu Deus bo:

— O Deus myzo tysitsapusarekta — iwa batu zikaha. Ikiahatsa tihi:

— O myzo asahi nimysukyrykynahatsa tu tysisapywyky — tsimaha.

¹⁵ Kytsa sakurêtsa tuk zeka ikiahatsa kino ahakurêtsa tsimoziknaha! Siakubyitsa tuk mykaranaha zeka ikiahatsa kino batu ahaku. ¹⁶ Kytsa sizubarêtsa tysipokzitsikinahaktsa! Tyhapepokzitsikinahaktsa! Sinamybyitsa kino ahaharereziuwyttsa moziknaha. Batu tyso:

— Katsaktsa myhyrinymyrêtsa — iwa batu abazubatsa tsimaha.

¹⁷ Asahi simysapybyitsa tu ahabo nikaranaha zeka batu isty tsapusare. Hawa kytsa okzeka wasani tsimykaranaha. Iwaze kytsa ahasoho ty batu tyso:

— O asaktsa batu simysapy maha — iwa batu zikaha. ¹⁸ Aha humo batu ihokdaha byizeka kytsa tuk yh̄y tsimaha, batu ahamyiki.

Tsahamykpyriziurêtsa. ¹⁹ Batu aty tohi ba ziktatsapusare. Kytsa imysapybara ty mykaranaha Deus zuba tsihyrinymyrêta, atahi sinini ykarawy bo mysipeha. Deus harere papeu humo ziwatahaka:

— Utakta kytsa bo asaktsa kytsa nisisapybyrikinaha, mysitsapusare, simysapybyitsa nikaranaha humo mysisininiwy sihuak waha humo mysisininiwyky — niy.

²⁰ Usta Deus harere papeu humo ziwatahaka:

— Asukyrytsitsa saraparêtsa zeka, adisahawy ty sibo nyny tsimy.

Sarapurukrêtsa zeka pihik ty sibo nyny tsimy.

Iwa tsimy zeka sisikpybyrêtsa moziknaha — niy.

Iwa Deus harere papeu humo ziwatahaka.

²¹ Iwaze simysapybyikitsa ahape maha zeka:

— Katsa mywatu tahaktsa! — maha. Ikiahatsa ispe tsimaha:

— Batu h̄y — tsimaha. Ahatsapusarebyitsa tu kytsa

tysisapywykynahaktsa. Iwa tsimyzurukunahaktsa kytsa!

Mybarawy ezektsa ahapehatsa harere bo yh̄y tahaktsa.

13 ¹ Kyze mybarawy ezektsa ahapehatsitsa sitsumuêh̄tsa kino niwatihi siharere bo yh̄y tahaktsa! Ahapehatsitsa pahapehanaha

Deus harere humo zuba — ikiahatsa tysipehanaha — my iwatsahi pahapehakanaha. Iwa Deus mykara. ²Iwaze aty zeka ipehatsa tsumuêhĩtsa harere bo yh̃ ahabyizeka atakta Deus harere bo kino niwatihi yh̃ ahabyizeka iwatahi sinini mykara.

³Asaktsa wasani mykaranaha tahapehatsa humo batu sipyby. Asahi batu sopyksapy mykaranaha zeka tahapehatsa pokso sipybyrẽtsa. Ahapybybyi zeka mypehatsa tysisapywykynahaktsa kytsa! Iwa tsimykaranaha zeka asahi:

— O ikiahatsa wasani tsimaha — maha.

⁴Ahapehatsa tsumuêhĩtsitsa ahahumo simypokzitsiukrẽtsa moziknaha. Siharere bo yh̃ ahabyizeka ahamysapybyitsa ty zuba tsimykaranaha. Deus pahamyitsapyriwyky siharere humo, asaktsa sitsumuêhĩtsa babatsa maha iwatsahi mysapybyitsa tu tsimykaranaha zeka ahapehatsa pokso ahapybyrẽtsa tsimoziknaha ana kino wasani my. ⁵Iwatsahi apehatsa tsumuêhĩtsa siharere bo hỹ tahaktsa! Siharere bo yh̃ ahabyizeka sipokso tsahapybyrẽtsa, sinini tsimaha humo tsahapybyrẽtsa. Siharere bo hỹ ahabyizeka iwaze sinini tsimykaranaha Deus okzeka wasani my, iwatsahi ikiahatsa siharere bo hỹ tsimaha.

⁶Ana humo hi ahaokyrysaro ty tsapakte bo apehatsa bykytsa bo nyny taha. Tarabaja mykaranaha zeka Deus harere humo sihyriziktsokzawy mykaranaha. ⁷Amy ty sa ihuak ty sibo nyny tsimaha zeka anaty kino sibo nynyzo tsimaha. Apehatsa tsumuêhĩtsitsa harere bo tsiwabytoktonahaktsa! Siharere bo yh̃ tahaktsa!

Tyharape pokzitsikinahaktsa.

⁸Batu aty tohi bo ihuak ty ibo nynyzo zikaha. Ahahuak humo tsipykbanaha! Tyhapepokzitsikinaha zubaktsa! Ana kino tsimaha zeka myhuak watsa kytsa bo botu nyny tsikaha. Utsa kytsa bo tsipisapywyikiknaha zeka iwaze Moises sopykwy bo tsizubarẽna tsimykaranaha. ⁹Deus harere isopyk tihi:

— Mektsa okeza ba ziksipyriryknaha. Ba zibezenaha. Usta namy ty hyryk hyryk byitaha. Harape namy bo ka iktsa zubataha — niy. Iwaze ipehaw ty tihi:

— Aotutsa pauksitsa humo tynasipokzitsikinahaktsa ahumo tsinakara nahawa tihi tysipokzitsiki — niy. Ana humo kino yh̃ tsimaha zeka taparaktsa harere niwatihi yh̃ tsimykaranaha. ¹⁰Aty zeka ipytowybara ty pauksitsa mysisapywyky zeka ba zimyi. Iwatsahi ahamyibyitsa tu zeka Deus harere bo hỹ tsimykaranaha h̃.

Wasani tsimyzurukunahaktsa kytsa!

¹¹Iwaze kapehaw ty hawa tsimyzurukunaha wa tynakaranahaktsa kytsa! Sesus myziksizo. Ikiahatsa Sesus harere bo hỹ tsimykaranaha

zeka hanawa puruze taperyky. Iwatsahi ahaõtutsabyihu ja. Sesus taperyky! ¹²Hanawa puruze Sesus Kiristu myziksizoze nakyoksohoze kywa. Iwatsahi mysapybara tsikykaranaha mytamoewybaik! Asaktsa mysapybyitsa tu mykaranaha miwa zuba siakparawy. Kytsa sibo batu iktsa zikaha. Sipapatu nikaranaha. Ikiahatsa batu siwatsa tsimahaktsa! Deus mozihihik ana ty hi tsimykaranahaktsa kytsa!

Sodadutsa sibotoarëtsa iwatsahi tahasukyritsitsa weryk tu tahazozikbanaha. Siwatsa katsaktsa Kiristu zikwy mytuk mynapykyryk zeka wasani tsimoziknaha. Ba zikmyizonaha. ¹³Iwa wasani tsimyzurukunaha zeka batu mysikpyby. Kytsa watsa asahi okoroze mynakurunaha iwaze kytsa sizubarëtsa sibo iktsa maha. Siopuwy tsõĩ ty ka tsõ tsõ byitaha. Tsipikukunaha zeka tsimyarape sapybyikinaha siopuwy tsõĩ humo. Utsa okeza humo ba ziksityrykzuwynaha! Sibo hua hua byitahaktsa! Usta maku bo harape tyka wowo byitaha iwa zeka pahamyiba! Ahazokdibihiu ja! Harape tyhudiduhudu byijataha! ¹⁴Katsa hawa sa tsimyzihikiknaha ana ty hi tsimykaranaha zeka mysapybyitsa tu tsimykaranaha. Hawa tsimyzihikiknaha ana humo kino awatutaha! Sesus Kiristu zikwy mytuk mynapykyryk iwaze imysopyksapybara humo batu hỹ tsimaha. Sodadutsa sibotoarëtsa maha iwatsahi tahasukyritsitsa weryk tu tahazozikbanaha. Siwatsa Sesus Kiristu zikwy mytuk mynapykyryk iwaze mysapybyitsa tu tsimykaranaha batu hỹ tsimaha ihumo tahamoewy. Iwatsahi katsa hi:

— O Kiristu azikwy mytuk mynapykyryk! — tsimaha. Iwa hỹ.

Atukytsa ba zikarapepeha.

14 ¹Iwaze kytsa Sesus harere bo hyỹ mykaranaha sihumo ahakubyrisoroku ja tsimaha. Asahi:

— Hawa skaraba Deus okzeka wasani my. Katsaktsa tsikaeni zuba myhyrinymyry — maha. Sihumo ahakubyrisoroku ja! Ba zikarapepehanaha iwatsatu meky watu mytsaty mykaranaha. Mysitsumuëhĩnaha! ²Wastuhu kytsa Sesus tuktsa:

— Katsaktsa siraratsani humo mysiborokonaha zeka Deus okze ka wasani — mykaranaha. Utsa Sesus tuktsa:

— Katsaktsa myzohotsa tahaborokonaha zeka Deus okzeka batu wasani. Iwatsahi wihara ty zuba tsinamydisahakanaha — mykaranaha.

³Asaktsa siraratsani humo mysiborokonaha batu tyso:

— Asahi wihara ty zuba natahadisahakanaha batu sihyrinymyry — mykaranaha. Iwa tsimytsasokonaha zeka tsisisapybyrikinaha. Siwatsa asaktsa wihara ty zuba tahadisahakanaha batu tyso:

— O asahi siraratsani humo piboronahaze simysapybyitsa tu mynakaranaha — mykaranaha. Iwa tsimytsasokoronaha zeka tsisisapybyrikinaha. ⁴Aty ipehatsa tsipisapybyiki zeka batu wasani my,

ipehatsa zuba isoho pisapybyiki. Katsa Sesus tuktsa Deus mypehakatsa. Atakta Sesus tuktsa mypehakatsa Deus harere humo zuba hyĩ mynakara. Hawa mykara Deus ipe:

— O nawa tsimykara wasani — my. Ata hi zuba awatu mynakara.

Imysapybyita tu mykaraze Deus ipe:

— O nawa tsimykara batu amysapy — my. Mypehakatsa zikwy ituk mynapykyryk nawa wasani mozuruku hĩ.

⁵Aty:

— Nawa puruze tabyryky Deus okzeka tisapyrēna iwatahi ba amy tohi humo zikaha — my. Usta batu:

— Pibytuhukutu atsatu maha iwatahi kahyrikosokzawy humo mykara — mykaranaha. Estuba estuba zuba tahapetu sisopyk:

— Hawa ha ty mozuruku zeka wasani — mykaranaha. Deus okzeka kytsa meky watu mytsaty mykaranaha zeka wasani my. ⁶Aty zeka:

— Nawa puruze tabyryky iwatahi ba amy tohi humo zikaha iwa Deus pokzi mynakara. Aty tazoho piboro zeka:

“O Deus myzo kakurēta, ikiakta kazoho ty kabo nyny tsiky” — my iwa Deus bo mynapamykyso. Aty wihara ty tadisaha zeka:

— O Deus myzo kakurēta, ikiakta kadisahawy ty kabo nyny tsiky my — iwa Deus bo mynapamykyso. ⁷Batu aty tohi tabo zuba mynakara. Myokzetuze hawa tsimyzurukunaha zeka Deus mynamysukparaka. Tsimyhyrikosokdanahaze Deus mynamysukparaka iwatsahi mywahi Deus tyryktsa tsimoziknaha. ⁸Iwatsahi myokze tuze Deus mypehakatsa harere bo yhyĩ tsimykaranaha. Tsimyhyrikosokdanaha zeka Deus tuk tsimynapykyryknaha. Iwatsahi katsaktsa mywahi Deus tyryktsa tsimaha. ⁹Kiristu mypehakatsa anahumo hi nihyrikosokda. Iwaze zuba Deus zihyrikipowy ispitu niyzikzo. Abaka mypehakatsa niyzik, Kiristu tuktsa botu nihyrikosokdanaha atahi sipehatsa niyzik. Katsa kino niwatihi iharere bo hyĩ tsimykaranaha atahi mypehakatsa. Myzubarētsa mypehatsa niyzik.

¹⁰Ikiahatsa ja. Wastuhu kytsa ahatuk ahatukytsa tsimysisapybyikinaha. Batu imysapy tsimaha. Utsa ahatuk ahatukytsa tsimysisapybyikinahaze ispe maha:

— Ikiahatsa batu wasani tsimaha — tsimykaranaha. Ikiahatsa mytsatziutahaktsa amy wa taba parakbaha Deus okze tsinamykahabanahazo iwaze myhuak ty mybo nyny my, hawa haty tsikzurukunaha mybo ihuak ty nyny my. ¹¹Deus harere papeu humo botu iwatahaha:

— Mybarawy ezektsa na watsa tu kaokeryk tahaekaratsa humo puruk puruk maha,
(kahumo iktsazuba mykaranaha humo puruk puruk maha).
Mywatu: “Ikia zuba Deus babata” maha.

Sizubarẽtsa mybarawy ezeiksa iwa mykaranaha — niy.

¹²Mywatu Deus bo tsimaha. Hawa mybarawy eze zikzurukunaha ana hi Deus bo tsimysasonaha, iwaze myhuak ty mybo nyny my.

Atukytsa soho ba zisapybyrinaha.

¹³Iwatsahi mytukytsa ba zik soho metunaha! Mytukytsa okzeka wasani tsimyzurukunahaktsa kytsa! Mypetu mysopyk:

— “Hawa hasa mytukytsa pimysapybyikinaha iwaze asahi batu hỹ zikaha” tsysitsumuẽhĩ — tsimaha. ¹⁴Hawa Sesus mytsaty mykara uta kino niwatihi mytsaty mykara. Disahawy tsizubarẽna kabo ty wasani ana humo kahyrinymyrẽta. Ustsaktsa hi:

— O ana disahawy kahumo batu wasani — mykaranaha. Iwaze asaktsa ana disahawy ty tahadisahakaranaha zeka sihumo ka batu sapy. Iwatsahi pimysapybyikinaha.

¹⁵Ikiahatsa ahazoho tsipiborokonaha zeka ahatukytsa bo batu sapy my, iwa zeka ahahumo batu siaku. Ahazoho tsipiborokonahaze ahatukytsa ana bo hi iktsa maha zeka ahahumo tahasapybyikinaha. Iwa tsimyzurukunaha zeka ahatukytsa ba ziksipokzitsi. Ahazoho humo zuba ahatukytsa tsiksisapybyikinaha. Kiristu sisapyzeken nihyrikosokda ikiahatsa humo hi Deus tuk ba zik kapykyryk naha.

¹⁶Iwatsahi ahaokze ka tisapyrẽna ana kino ustsaktsa kytsa pisapybyikinaha. Sibobatu imysapy my zeka batu tyso — O mahani, ana ty hi wasani — iwa batu tyso. Nawa tisapyrẽna pisapybyikinaha.

¹⁷Katsaktsa Deus tyryktsa tsimaha. Amy ty sa hauk tsimykaranaha, amy ty sa tsipikukunaha nawa humo hi Deus tyryktsa batu zikyzyknaha. Batu ba. Deus hyrikoso humo ityryktsa tsimoziknaha. Ata humo hi Deus harere bo hỹ tsimykaranaha. Ata humo hi mytukytsa ba zikmybetsaknaha tsysizikwykynahaktsa. Ihumo mykurẽtsa hỹ. ¹⁸Iwa tsimyzurukunaha zeka Deus myhumo tsakurẽta mozik. Ustsaktsa kytsa kino:

— Deus situk mynapykyryk iwatsahi ityryktsa moziknaha wasani mykaranaha — maha.

¹⁹Iwatsahi tyharape pokzitsikinahaktsa kytsa! Kytsa tsysipunihikwykynahaktsa tsimaha. Iwaze ustsaktsa kytsa ahahumo Sesus harere bo hỹ mykaranaha.

²⁰⁻²¹Ikiahatsa siraratsani natahaborokonaha. Ahabo tisapyrẽna. Ustsaktsa Sesus tuktsa sizoho meky watu zeka batu hauk zikaha, sihumo ka batu isapy maha, iwaze ikiahatsa kino niwatihi situkze ahazoho ty batu hauk tsimaha. Ahazoho ty siokze hauk tsimaha zeka ahatukytsa ahahumo Sesus harere bo batu hỹ mykaranaha. Iwatsahi ahazoho ty hauk hauk ahabyitaha! Duabohotsa tsik siokze tsõ tsõ byitaha! Iwa tsimaha ty zeka ahatukytsa tsimysisapybyirikinaha batu zikaha! Iwa ahatukytsa tsysipokzitsiki. Sihumo imysapybara ty ka hauk hauk ahabyitaha! Iwaze ahatukytsa ba zisimiywy.

²²Ahaokze ka sizoho ty sasabyitsa kino niwatihi wasani my. Deus bo zuba ana soho ty tsimytsasokonaha. Utsa kytsa bo ba ziktsasonaha. Asaktsa batu paikpa mytsaty zikaha iwatsahi sakurëtsa mopykyryknaha. Asahi amy ty tisapyrëna mykaranahaze batu tyso:

— Ana kino tisapyrëna yhÿja — iwa batu tyso. Iwaze asaktsa sakurëtsa hÿ. Hawa batu isapy mytsaty mykaranaha zeka awatutaha. ²³Aty zeka izoho ty sasabyitsani kino niwatihi piboro zeka:

— Ana ha azoho ty Deus okzeka tisapyrëna ja. Yhÿja — my. Deus isoho:

— Hawa tsimykara batu isapy — my. Sihyrinymyrybyitsa tu hauk maha zeka iwaze sibo batu isapy my. Hawa tsimykaranaha ana soho ty:

— Hawa tsimykaranaha wasani my ana humo hi myhyrinymyrëtsa — tsimaha. Iwaze wasani my. Katsaktsa hi hawa tsimykaranaha ana soho ty:

— Hawa tsimykaranaha wasani ja. Yhÿ ja — tsimaha. Iwaze Deus okzeka imysopykbara ty tsimykaranaha.

Utsa bo tysiakuwyky.

15 ¹Katsaktsa Sesus harere bo hyÿ tsimykaranaha hÿ mytukytsa Sesus tuktsa bo tysiakuwykynaha. Ahakubyrisorokuja! Mytukytsa asa hi:

— Amy skaraba Deus okzeka wasani my. Katsaktsa batu myhyrinymyry — mykaranaha. Asaktsa tsikaeni zuba Sesus harere bo hyÿ mykaranaha. Iwaze katsaktsa mybo zuba batu mytsaty zikaha, sibo hi mytsaty tahaktsa! ²Mytuktsa pauktsitsa Sesus tuktsa tysiakuwykynaha! Tysisapywykynaha iwaze Sesus harere bo hyÿ maha.

³Kiristu soho bo mytsaty tsimahaktsa! Ihumo zuba batu mytsaty ziknakara utsa kytsa bo zuba mytsaty ziknakara hÿ. Iwatsahi ikiahatsa iwata niwathiaktsa kytsa! Deus harere papeu humo ziwatahaka:

— Asaktsa ziksapybyikinaha anahi Deus bete zizozoko naha — niy. Iwa ziwatahaka Sesus soho niy.

⁴Deus harere papeu humo mytsyhyryze ziwatahaka. Ana ty hi mymyhyrinymyryky, ana humo tsipinymyrynahaze mykubyrisorokrëtsa tsimoziknaha. Tshipinymyrynahaze ihumo mypunihikrëtsa tsimoziknaha. Iwatsahi isapyrënikia ty taperyky, Deus papeu humo mymykuwyky.

⁵Deus bo ahatsyhyryze mopamykysoikik ipe mykara:

— O myzo ikia zuba tsimymypunihikwyky, ikia zuba tsimymozikwyky, ana kino Homa ezektsa bo nyny tsimy. Hawa mozihikiknaha zeka estuba zuba wata moziknaha, ikia humo mysitsumuëhÿkÿ iwa tsimy. Nizihikiknahatsa hi Sesus Kiristu wata maha. Hawa Sesus Kiristu zikzuruku asa kino niwatihi iwata mozurukunaha — iwa Deus bo ahatsyhyryze mopamykysoko. ⁶Iwaze ikiahatsa ahazubarëtsa Deus bo tsimysakibazikiknaha:

— O Deus myzo ikia zuba mypehakatsa. Ikia zuba amysapyrënikita — tsimykaranaha. Iwaze Deus Sesus Kiristuzo bo tsimysakibazikiknaha.

Deus wasaniha Sudeutsabyitsa bo motsaso.

⁷Iwatsahi tyharapehapokzitsikinahaktsa kytsa! Hawa Kiristu ahahumo tsimypokzitsiarëta ikiahatsa atsatu harape bo tsimykaranahaktsa! Kyze kytsa tihi:

— O Deus tsimysapyrëta ihyrytsa bo iktsa tsimaha. Hawa ihumo zuba myharape pokzitsikinaha, iwatahi Deus tsimysapyrëta hỹ — mykaranaha. ⁸Kiristu mybarawy bo inasik. Sudeutsa Deus bo mysioktyhyrykta anahumo hi inasik. Izumuze nisihrinymyryky hawa ha ty Deus botu nitsasoko nisihrinymyryky atsatu mykara. Taparaktsa mydiritsa hawa ha ty Deus sibo botu nitsasoko atsatu Sesus nikara, izumuze Sudeutsa Deus bo mysioktyhyryk. ⁹Mybarawy bo inasikze Sudeutsa mysioktyhyrykta Deus bo my, Sudeutsabyitsa kino niwatihi Deus bo mysioktyhyryk. Asa hi:

— O Deus ikia tsamysapyrëta myhumo kino niwatihi tsamypokzitsiarëta, Sudeutsabyitsa tsimaha — mykaranaha. Tapara Deus harere papeu humo ziwatahaka:

— Iwatahi utakta Sudeutsabyitsa situkze Deus pe “Ikia zuba wasani tsimy. Ikia zuba amysapyrënikita my”
Sudeutsabyitsa ana hi piwabykynaha, abo iksakibazikikze ana hi piwabykynaha — niy.

¹⁰Usa papeu humo:

— O Sudeutsabyitsa ikiahatsa Deus watawyhytsa
Sudeutsa tuk ahakurëtsaktsa! — niy.

¹¹Usa papeu humo:

— O Sudeutsabyitsa sizubarëtsa Deus bo tsimysakibazikiknahaktsa!
Mybarawy ezektsa nanabyitaba sizubarëtsa kino niwathihaktsa! “O ikia zuba wasania ty zuba tsimykara.” tsimahaktsa — niy.

¹²Deus sohokotsa Isaijas usa papeu humo ziwatahaka:

— Taparakta mydiri Sese estuba tsekoka
Sudeutsabyitsa pehakatsa mozik.
Deus bo mysioktyhyryk, isapyrënikia
humo piperykynaha hỹ — niy.
Sese tsekoka Kiristu my.

¹³Iwatahi Deus ahatsyhyryze ipe my:

— O Deus myzo ikia hi isapyrënikia ty taperyky atuk mywahi mynapykyrykynaha ana kino taperyky. Ikia tysiakuwyky hỹ batu paikpa mytsaty zikaha. Aharere bo hỹ mykaranaha iwatsahi ahumo sispirikporëtsa moziknaha ahyrikoso humo mospirikpotohinaha, azikwy humo sispirikporëtsa hỹ — my. Iwa Deus bo mopamykyso.

Pauro Homa ezektsa bo mypubara ty motsasoko.

¹⁴O katukytsa utakta ahasoho humo inymyryba ahamysapyrëtsa hỹ. Ahahyrizikporëtsa ana humo hi kahyrinymyrëta. Tyhapehyrinymyrykynaha. ¹⁵Iwatatuze papeu humo ahabo piwatahaka wasania ty piwatahakazo batu kasikpyby ana humo ahaspiriktsokdabyihu ja. Deus harere motsasoziuku iwaze anasoho bo hi mytsaty tsimykaranaha. Iwa my Sesus Kiristu humo atahi kahyritsokzawy humo zikpeha.

¹⁶Utakta Sesus Kiristu tsumuëhĩtsa, ana bo hi zikwatawy. Uta Sudeutsabyitsa bo zikwatawy. Deus harere wasania ty sibo motsasoko ana humo hi zikwatawy. Utakta Deus wahoro zubata eze ziknapamykysokota wata asa humo ka Deus tsakurëta. Hawa Deus nizihikik ziknakaranaha ana humo hi Deus tsakurëta. Iwatatu Deus wasania ty Sudeutsabyitsa bo motsasoko, kyze Sudeutsabyitsa Sesus harere bo hyỹ mykaranahaze Deus ana humo hi tsakurëta hỹ. Asaktsa meky watu moziknaha, Deus hyrikoso humo simysapyrëtsa moziknaha, Deus tiryktsa moziknaha.

¹⁷Deus tsyhyryze tarabajaziu mynakara, hawa Kiristu mozihikik naha humo zuba mynakara iwatahi kahyritsokzawy humo kakurëta. ¹⁸Kiristu kahumo Sudeutsabyitsa Deus harere bo hyỹ mykaranaha izikwy kahumo hi katuk mynapykyryk. Iwatsahi Sudeutsabyitsa Deus harere bo hyỹ mykaranaha. Batu kasikpyby. Hawa iktsasoko naha humo batu kasikpyby. Hawa ikykara ana humo hi batu kasikpyby iwatahi Sudeutsabyitsa Deus harere bo hyỹ mynakaranaha. Hawa skaraba Kiristu mozihikik ana humo hi yhỹ mynakara iwaze Sudeutsabyitsa Sesus harere bo hyỹ mynakaranaha hỹ.

¹⁹Deus zikwy katuk mynapykyryk, ihyrikoso humo amy ty kytsa batu zikaha utakta ikykara. Deus hyrikoso katuk mynapykyryk iwatahi kytsa iksizorowoy. Iwatsahi kytsa kabo iktsaziu nikaranaha iksi humo kyokbaik. Iwatawytsa humo Deus wasania ty bo yhỹ mykaranaha. Nanabyitaba Deus wasania ty Sesus soho iktsasoko, taparaka Serusarëhe eze iktsasoko, iwaze ikparakzo nokponi ikukuru. Iriria bo ikzumu. ²⁰Utakta Deus wasania ty motsaso tsihikik asa hi Sesus soho batu siwabyhy. Asaktsa isoho batu siwabyhy ihumo sispirikpobyitsa sibo hi Deus wasania ty iktsasoko. ²¹Hawa Deus harere papeu humo botu ziwatahaka anawa ha ikykara papeu humo:

— Asaktsa Deus zipehata soho batu siwabyhy isoho piwabykynaha. Deus wasania ty isoho piwabyziukunaha — niy.

Pauro Homa bo mynakozore tsihikik.

²²Kyze utakta ahabo mynakozore tsihikik batu zik. Deus wasania ty siwabyhybyitsa bo motsasoko iwatahi ahabo batu pão. ²³Abaka

hyriziktsokzawy nabytykara eziky nepykbaik. Iwa niytyk tseheze tsizubarēna ahabo mynakozore tsihikik.

²⁴Ahabo moparakze ahatuk pyryspykare my mokozore. Espanija bo moparakze ahaburuk my. Iwaze Espanija bo moparakze ikiahatsa hi tsipiktsumuēhīnaha. ²⁵⁻²⁶Abaka Serusarēhe bo mokuru. Masedonia ezektsa, Akaija ezektsa ahatsa niwatihi siokyrarsaro waka ziperykynaha. Ana okyrarsaro ty Serusarēhe ezektsa Sesus tuktsa sinamybyitsa bo pinyny tsihikiknaha. Iwatahi ana okyrarsaro waka sityshyryze wabehyryk my sinamybyitsa bo nyny my. ²⁷Asaktsa Masedonia ezektsa, Akaija ezektsa ahatsa niwatihi Sudeutsabyitsa maha. Sesus harere bo hȳ mykaranaha iwatsahi ihumo sispirikporētsa. Sudeutsa hi Deus wasania ty sibo nitsasokonaha anahumo hi batu sispiriktsokda. Iwatsahi siokyrarsaro ty ziperykynaha ana ty hi Sudeutsa sinamybyitsa bo nyny maha iwa mozihikiknaha. Sudeutsabyitsa Sudeutsa mysitsumuēhīnahaze wasani my iwa sinamybyitsa bo mysitsumuēhīnaha. Sesus humo situkytsa moziknaha.

²⁸Anahyrikosokzawy nepykze, ana okyrarsaro ty tsizubarēna sinamybyitsa bo nyny my, iwaze Espanija bo moparakze ahaburuk mynakozore. ²⁹Ahabo pomoze hawa Kiristu pahasapywy tsihikik ahatuk motsasoko. Kabo piksapywyky ahabo niwatihi pahasapywyky. Kaharere isoho humo ahakurētsa tsimoziknaha.

³⁰O katukytsa katsaktsa Sesus harere bo hȳ tsimykaranaha iwatsahi ihumo mspirikporētsa, Deus hyrikoso humo tsimyharape pokzitsikinaha iwatsahi kasyhyryze Deus bo typamykysonahaktsa kytsa! Iwa mozihikik h̄y. Ipe tsimaha:

— O myzo ikia Pauro tsitsumuēhīkta! Ahumo tsipunihikrēta mozik. Mokuruze typokzitsikta. ³¹Asaktsa Sudeutsa aharere bo batu h̄y maha, Pauro ty ka beze beze byitaha, ity ykni ykni byijataha. Ikia Pauro tsipokzitsikta! Serusarēhe ezektsa Sesus tuktsa tysitsumuēhīktsa! Sudeutsabyitsa siokyrarsaro piaksekenaha, ana humo kino amytsatyhy byihuja ahumo sakurētsa moziknaha — tsimaha iwa Deus bo kasyhyryze tsimypamykysokonaha.

³²Ana humo kino tsimykaranaha zeka kakurēta mozik. Iwaze Deus mozihikik zeka ahabo mynakozore. Kakurēta h̄y. Ikiahatsa tsipikykykynaha niwatihi ana humo hi kahyrinymyrēta. ³³Deus bo ahatsyhyryze mopamykysoko:

— O Deus myzo Homa ezektsa tysipokzitsikta! Batu paikpa mytsaty mykaranaha ahumo sakurētsa moziknaha — my. Iwa h̄y.

Sizubarētsa humo kahyrikbarēta.

16 ¹Kyze Pebe inarokotatsa myzawy pe:
— Ikia tsamysapyrētatsa — my. Atatsa Sesus tuktsa izumubanahaze Deus harere piwabykynaha mysitsumuēhīkī. Asaktsa Kēkereja ezektsa mysitsumuēhīkī. ²Ahabo mozumuze ikiahatsa hi:

— O myzawy pany pakutynty. Mytuk tsikadisaha mywahoro eze tsikuru — tsimaha. Iwa Sesus tuktsa sizubarẽtsa tynahapepokzitsikinahaktsa. Atatsa kino sizubarẽtsa nisitsumuẽhĩkĩ atatsa ziktsumuẽhĩkĩ. Iwatsahi hawa itsyhyryze tsimaha ana ty kino tsimahaktsa!

³Kytsa sizubarẽtsa Homa ezektsa sihumo kahyrizikbarẽta Pirusira, Akuiro ibarikta kino niwatihi sihumo kahyrizikbarẽta. Asahi katuk Sesus Kiristu tsyhyryze tarabajazu ziknakaranaha. ⁴Kapokzitsiwytu asiba tahabawynaha. Sisoho motsasoko:

— Tsahamysapyrẽtsa — mynakara. Iwa ustsya kytsa Sudeutsabyitsa mykaranaha. Sesus tuktsa nanabyitaba atsatu motsasokonaha. Asaktsa izumubanhaze Deus harere piwaby tsihikiknaha. ⁵Sesus tuktsa niwatihi siwahoro bo izumubanhaze sihumo kahyrizikbarẽta.

Epeneto inarokota kaharereziwy humo kahyrizikbarẽta. Atakta taparakta Sesus harere bo hyỹ nikara Asia ezekta my.

⁶Maria humo kahyrizikbarẽta niwatihi. Atatsa ahatuk Deus pokzi tarabaja ziknakara.

⁷Katukytsa Āderoniko, Sunias ahatsa niwatihi sihumo kahyrizikbarẽta. Katuk sakyriukrẽnikitsa hurukwy eze niapykyryknaha. Asaktsa Deus nisipeha Deus harere nitsasokoronaha ana humo kino siakzohotsa sihyrinymyrẽtsa. Utakta batu Sesus tukta tuze ihumo batu kaspirikpobyize asaktsa botu Sesus tuktsa niaha.

⁸Āpiriato humo kahyrizikbarẽta. Atakta kaharereziwy hyỹ ata kino Sesus harere bo hyỹ ziknakara niwatihi.

⁹Urubano humo kahyrizikbarẽta atahi katuk Sesus soho nitsasoko. Estakis kino niwatihi kaharereziwy humo kahyrizikbarẽta.

¹⁰Aperes humo kahyrizikbarẽta atakta tsakubyrisorokrẽta tu Kiristu tuk mynapykyryk. Aristoburo wahoro ezektsa kino niwatihi sihumo kahyrizikbarẽta.

¹¹Katuky humo Erodiaõ humo kahyrizikbarẽta. Naresiso wahoro ezektsa humo niwatihi asaktsa Sesus tuktsa sihumo kahyrizikbarẽta.

¹²Myzawy Tiripaena, Tiriposa kino niwatihi asiza Sesus Kiristu tsyhyryze tarabaja ziknakaranaha asiza humo kahyrizikbarẽta. Myzawy Periside kaharereziwy atatsa humo kamypokzitsiarẽta atatsa humo kahyrizikbarẽta, atatsa hi Sesus tsyhyryze tarabaja ziknakara.

¹³Hupo atahi Kiristu ziwatawy ihumo tsipunihikrẽta hyỹ. Ije humo niwatihi, sihumo kahyrizikbarẽta. Atatsahi ziksapywyky itse wata ikyzyk kasopyk.

¹⁴Asĩkiritto, Perekõte, Eremes, Patorobas, Eremes, iwatsa mytukytsa situk niwatihi sizubarẽtsa humo kahyrizikbarẽta.

¹⁵Piroroko, Suria, Nereu izawy Orĩpas iwatsa Kiristu tyryktsa situk sizubarẽtsa humo kahyrizikbarẽta.

¹⁶Kytsa ahamo ahamypokzitsiukrẽtsa tsimymywatawynaha iwatsahi tuharapeharapyryknahaktsa. Sizubarẽtsa Sesus tuktsa nanabyitaba

asahi mozumubanaha Deus harere piwabykynaha, asaktsa ahahumo sihyrizikbarẽtsa hỹ.

Asiba nepyk kapehawy bo wabytoktotahaktsa.

¹⁷Iwaze katukytsa kapehawy bo tsiwabytoktonahaktsa! Asaktsa myharape sakbyrikinahatsa ihumo ahasopykziuhu! Hawa botu tsinymyrynaha anahi pimyi tsihikiknaha. Pahaknikinaha. Sibara botu tahaktsa! ¹⁸Asaktsa hawa Kiristu mozihikik batu hỹ zikaha. Taha bo zuba sisopyk. Asahi:

— Myharere baba. Hawa wasani ana tihi tsimykaranaha — iwa mybarapetu mykaranaha. Kytsa sispirikpobyitsa tu mysisapybyikinaha iwatsahi sihumo paikpa mytsaty mykaranaha.

¹⁹Ikiahatsa humo kakurẽta hỹ. Kytsa sizubarẽtsa nanabyitaba ahasoho piwabykynaha hawa Sesus Kiristu harere bo zuba hyỹ tsimykaranaha iwatsahi ihumo ahaspirikporẽtsa tsimoziknaha ana hi ziwabynaha. Iwatsahi isapyrẽnikia ty zuba tahaktsa kytsa! Imysapybaraka tsmoewybaiknaha. ²⁰Deus ba hawa tohi zizukninaha iwaze Satanas zikwy myzipapykik iwaze ba zahayknizo iwatsahi ikiahatsa Satanas bo ka mytsaty mytsaty byitahaktsa! Iwaze Deus bo ahatsyhyryze ikpamykysoko:

— O Deus myzo tsysisapywykykta! — mykara.

²¹Katukta Timoteo ahahumo tsihyrizikbarẽta. Katuk tarabaja mynakara. Mytukytsa Rusio, Sasõ, Sosipataio iwatsa ahahumo sihyrizikbarẽtsa.

²²Uta Terisio amy ty Pauro motsasoko anahi papeu humo piwatahaka, uta kino niwatihi ahahumo kahyryzikbarẽta, katsaktsa Sesus harere bo hyỹ tsimykaranaha iwatsahi ihumo myspirikporẽtsa iwatahi ahahumo kahyryzikbarẽta.

²³⁻²⁴Kaijo ahahumo tsihyrizikbarẽta. Uta Pauro iwahoro eze ikapykyryk. Anaeze Sesus tuktsa mozumubanaha asa kino niwatihi ahahumo sihyrizikbarẽtsa. Erasto ahahumo tsihyrizikbarẽta, Korĩtio ezektsa atakta okyrysarõ perykytsa. Mytsy Kuarato niwatihi ahahumo tsihyrizikbarẽta.

Deus bo tsimysakibazikiknahaktsa.

²⁵O kytsa Deus bo tsimysakibaziknahaktsa! Katsaktsa:

— O Deus ikia zuba apunihihrẽnikita hỹ. Ikie zuba amysapyrẽnikita hỹ — tsimahaktsa! Atahi tisokpykziurẽta hỹ. Ata humo hi mypunihihrẽtsa tsimoziknaha, katsaktsa Sesus harere bo hyỹ tsimykaranaha izikwy humo tsikspirikpotohinaha. Deus wasania ty hawa Sesus kytsa Deus bo mysioktyhyryk motsasoikik. Kytsa sizubarẽtsa bo ana harere nitsasoko. Tubabatu anaharere mybarawy ezektsa bo tsihokdahařena. Abaka batu

ihokdaha. ²⁶Deus harere mybarawy ezeiksa sizubarẽtsa bo motsasoko, kytsa mysipeha wasania ty motsasokonaha iwaze asa kino niwatihi Deus harere bo hỹ mykaranaha, iwatsahi ihumo sispirikporẽtsa moziknaha. Deus koikny baktatu isohowy humo iwa iharere papeu humo tapara tu ziwatahakanaha aba kino atsatu mykara.

²⁷Iwatsahi Deus bo tsimysakibaziknahaktsa kytsa!

— O Deus myzo ikia tsahyrinymyrẽta babata ahyrinymyrywy wasani h̃y ikia zuba asopykziurẽta h̃y iwatsahi aharere bo hỹ tsimaha. Ikia hi Sesus Kiristu katsa mybo tsikzipeha iwatahi inasik iwatsahi atuk mywahi tsimynapykyryknaha. Ikia humo zuba mykurẽtsa tsimynapykyryknaha — tsimaha.

Iwa tsimysasonahaktsa kytsa h̃y. Niwazuba.

Pauro